

柯山集附拾遺

六





集 山 柯

遺 拾 附

(六)

17.8

1.1954

撰 未 張

柯山集卷四十七

啟

答林學士啟

伏審光膺宸綽。進直蘭臺。榮命始行。儒林增重。竊惟館閣之選。蓋待儒學之臣。既非典領之權。幾于冗散。又無議論之責。少補絲毫。宜非仕者之願居。而爲一世之所尙。蓋學問爲君子之事。職卑而待之不輕。詩書非俗士所知。祿薄而意則甚厚。雖厭居寂寞。夸者至謂之病坊。而脫略等夷。赤尉均稱于宰相。名旣如此。人猶貴之。而况將相之選。踵武相尋。祖宗以來。掄擇爲重。故本朝之寵儒者。雖他官必假此名。伏惟某官文麗而用長。才周而學富。父子濟美。兄弟有聲。行實著于家庭。經濟冠于朝右。冠豸彈擊。風霜凜然。攬轡按行。疑竇立解。已登進于卿棘。復入直于道山。豈專是正之功。實示超騰之漸。某淮楚晚進。場屋後來。辱登門牆。嘗備官屬。當趨風于末坐。乃首贄于長牋。爲禮則勤。循分而懼。孔鸞同列。忘魯鈍之卑飛。珠玉藏家。驚輝光于貧屋。永爲好也。何日忘之。

代人謝及第啟

因瑕疵于指玉。獻已過三。收奔敗以誓師。戰猶借一。僅能無辱。豈足言勞。伏念某受才樗疎。趨世迂闊。拙

無他技。幼刻意于藝文。家有遺風。世知名于科級。童子習雕蟲之技。已屢試于鄉邦。專門尙經術之科。曾再遊于禮部。一行作吏。終日坐曹。几硯已積于埃塵。詩書錯陳于朱墨。人耳人耳。頗羞請鑄之金。時哉時哉。思樂無求之雉。屬大明之繼統。仰衆正之來同。恥窮有道之邦。願列思皇之士。隨衆碌碌。僅乃有成。半世遑遑。所得如此。惟其無似。已合知榮。茲蓋伏遇某官。左右太平。設張治具。收才能于無間。本選舉于至公。刈楚旁及于艾。蕭澹川下通于溝澮。羞愧平津之策。絕意上游。庶幾毛遂之奇。收功下客。

潤州謝執政啟

比者伏奉告命。除直龍圖閣知潤州軍事。已于閏四月二十九日到任交割訖。伏以文章爲學者餘事。故先王不以經世富貴非人力所制。故君子以爲在天。而况修詞蹇淺。未涉作者之流。越世闕迂。每在衆人之後。則其投閒置散。愈後跋前。在所當然。夫復何恨。伏念某羈旅一介。憔悴餘生。困筮楚者十年。這飢寒於斗祿。仕已成于漫浪。意何有于功名。始誤寘于成均。復進升于儒館。佐東觀之論著。頗見舊聞。紀先帝之事功。遂遊藏室。擢升右史。密侍清光。雖學儒之至榮。豈草茅之素望。而疾病侵耗。心力衰疲。分敢自安。義當引去。駑馬自竭。驥歷塊而已超。神山在前。風引舟而忽遠。尙叨便郡。獲養殘軀。靜循此恩。蓋有所自。茲蓋伏遇某官。曲成萬類。器使庶工。直鍾豪鑿。疾者未嘗遽廢。大宋小桷。施之各以其宜。致此枵虛。未卽捐棄。獄訟希簡。職事不廢乎詩書。山林幽深。形骸頗爲之清快。庶餘齡之可養。幸沈痼之有瘳。仰報至恩。將必有在。

賀錢內翰啟

伏承內翰侍讀四丈。罷直內閣。升華禁林。解天府之浩繁。侍經帷之清燕。雖衆望所屬。理固當然。而成命既行。士以相賀。伏以學士號爲職親地要。實儒者之至榮。訓辭欲其言近指深。必文人爲充選。設官雖專于書詔。儲才常用于鈞衡。被選益艱。因人增重。雖從容入侍。獨高大白樂天之詞華。而論議經邦。復重德裕敬輿之術業。苟擅一長于此。皆爲稱職之才。洪惟本朝。繼有碩望。方當聖主之圖任。果見異人之來儀。伏惟某官。學總百家。才高一世。經守章平之學。世登晁董之科。無施不長。所治皆最。批竇蹈筵。在庖丁如無牛。越國過都。于騏驥爲歷塊。隱然公輔之望。久矣中外所期。俄聞異恩。大慰衆論。謀謨黼座。何慙天子私人。顧瞻玉堂。應歎吾家舊物。卽膺大拜。用究遠圖。某每愧庸虛。素承知獎。其爲欣快。實倍等倫。嘆白髮之侵陵。望青雲于寥廓。歲事已晏。德履多祥。更冀保頤。下副祝願。

宣州謝兩府啟

比者法當易地。恩使造庭。方奔命于半途。遽分符于使郡。地未殊于南北。舟楫相通。憂方切于困窮。廩祿有繼。雖徵幸出聖朝之厚。而曲成皆高位之仁。已見吏民。粗知風俗。茲蓋伏遇某官。受天間氣。爲國元臣。道德致君。議論垂世。器衆材而無棄。慮一物之遐遺。遂令罔功。每輒得所。退觀所領。自昔有聲。道德在人。有顏真卿之政事。登高舊賦。稱謝元暉之文章。某素乏詞華。不通吏道。一無稱可。全有便安。民消愁歎之聲。自緣聖治。家受飽煖之福。徒費君恩。尺寸無施。冒昧而已。歲事云宴。幾政多閒。伏乞俯爲華夷。精調寢

味。

賀錢都尉啟

伏承光膺綸綍。雄領節旌。遠俗知榮。侯藩增重。其爲僚屬。益倍歡愉。伏以懿親建邦。粵古今典。惟盛朝尙
王姬之貴。在一時皆妙選之才。旣內奉朝請。而爲國華。亦外假風聲。而持將鉞。屈天姻之華貴。尉南服之
荒遐。民社有光。江山增氣。恭惟某官。朝推令德。世有美名。夙以才猷。膺茲選擢。忠孝著甲。昔受大賚之王
封。簪笏滿門。今爲五世之卿族。聞望卓爾。寵祿從之。雖仰青雲之絕塵。亦受靈河之餘潤。優游美望。素欽
武子之才豪。留務不煩。久服征南之恩信。歲事已宴。賢履有休。更冀保調。以綏戩穀。

謝鮑承務啟

伏審光臨民社。宣布教條。德庇所臨。愚陋知免。竊惟漢唐之盛。惟以守令爲難。或由郎而出宰。邱民。或歷
縣而入官。華省。謂將責之經世。莫若試之臨人。恭惟聖朝。亦重茲選。凡膺民社之寄。莫非慈惠之師。伏惟
某官。炳蔚多文。淵源博學。行已信于鄉里。名久播于搢紳。素懷製錦之良能。方展割雞之利用。略據素業。
均惠遠民。牒訴雖繁。敦本可使無訟。鰥寡未乂。有政爲善養人。雖君子之微猷。蓋高才之餘事。况復江山
清遠。民物阜安。獄訟多餘。樽俎可樂。莫陪談笑。徒竊傾馳。過此以還。未知所措。

賀廣德知軍啟

伏以星回于天。旣發春而獻歲。帝出乎震。方去故而就新。天時于是更端。賢者受其介福。伏惟某官。風猷

強敏道義深純。度越衆人。獨立一世。烏臺彈擊。數千鈞之弩。而發機。山郡刺裁。持屠牛之刀。而破鱗。惟其道用。煥然日新。俯同世人。仰受天福。

謝建平知縣啟

茲者過沐殊私。特貽盛禮。一日之長。託末契之光華。通家之歡。傷前人之零落。俛跪之際。感喜交并。伏惟某官文學承家。吏能絕俗。一見許論于家世。並遊遂列于弟兄。昔日桑弧。交慶兩家之生子。相逢樽酒。共驚五十之幾年。敢不傳義好于子孫。謹銘藏于肺腑。過此以往。未知所裁。

賀太平知州啟

伏承輟講經帷。剖符江國。餘光所茂。弱植知安。伏惟某官。奧學造微。高行絕衆。赫奕家世。照臨遠方。清淨道心。消鎮浮俗。遙想公餘之多暇。未妨禪觀之無爲。出入起居。輕利安穩。某夙懷問道。幸託爲鄰。惟仁人志常在民。自今日請學爲政。雖相聞雞犬。實一葦可航之川。而坐困簡書。有其人甚遠之歎。願茲傾素。曷罄敷陳。

上黃州郡守楊懷寶啟

某愚暗觸禁。情不自知。仁聖至明。罰惟當罪。雖從黜責。尙得依歸。平生京洛之遊。交情有素。千里江山之別。老境已侵。豈知投竄之餘。忽有笑談之便。淋漓醉舞。坐沉痾而少衰。慷慨悲歌。撫壯心而猶在。靜言思咎。亦旣戒行。忽忘跋履之勤。喜遂瞻依之素。伏惟某官。天資拔俗。國器冠時。利刃吹毛。長劍耿介。倚天外。

高標絕衆。野鶴昂藏。在雞羣。擅風流。獨步之名。有雍容。甚都之觀。左挽繁弱。邁越石之奇。一割牛心。兼武子之逸。蓋嘗奉使諸部。固已著迹本朝。賦吳郡之溪山。醉金陵之風月。遺愛猶在。陳迹可尋。屈臨方州。實幸遠俗。某去國流浪。多病變衰。流水高山。知者益寡。附輿執轡。今也則亡。雖無聊遠竄之可憐。得相逢一笑。而何恨。私用自賀。夫復何言。春序正暄。更祈保衛。

賀潘奉議致仕啟

伏審親家。致政奉議。上還印綬。退卽里閭。已私知止之安。將受永年之福。凡居親舊。實助忻愉。竊以人之多難。在于儒者尤甚。壯年講學。謂富貴利祿之可期。小試多違。信功名遇合之有命。加以歲月荏苒。時不待人。顧瞻簪裳。義則當止。彼貪冒無恥者。率皆優佚而老。惟進退顧義者。不免飢寒之憂。未餘漢庭之賜金。復休故社之喬木。追計宦遊之廩祿。何有一毫。復與平生之簞瓢。相從三徑。莫非命也。謂之何哉。伏惟某官。與學淵源。懿行金玉。久栖遲于末路。遂高退于明時。清譽益隆。多祥有在。某自憐罪戾。久困泥塗。延企高風。但懷景仰。

答楊州司法謝薦啟

式懋才猷。顯膺褒薦。過敦謙德。躬贊高文。兢懼靡追。珍藏爲好。竊以長史薦士。蓋遵著令之文。小官求知。將應有司之格。然在下者常艱于際可。居上者亦歎于才難。苟蒙特達之知。亦謂非常之會。伏惟某官。溫恭飭己。道德承家。老成之典。刑具存。正始之風。流猶在。青衫手版。共歎棘棲之鸞。命衰貂冠。茲爲鴻漸之

冀既深感愧。又切頌祈。


疏

三天洞求雨疏

伏以宣城之境。春末以來。雨施不時。稻未得種。父子熟視而無告。官吏不知其所爲。凡曰有神。靡不致禱。豈德薄莫能感格。抑民災未易祓除。莽大澤與高原。赫炎風兮畏日。恭惟禪師。具千乘眼。得一佛乘。無有親疎。等加悲憫。護衆生如赤子。觀此世如掌中。則夫鬱興大雲。普降甘雨。宜翹足可待。實伸臂之勞。其在神通。蓋甚容易。眷茲千里之澤。請以三日爲期。時或有愆。事且無及。

三天洞謝雨疏

維清淨心。雖于三界無所著。以慈悲故。常憫一切諸有情。頃以旱災。輒伸誠禱。卽時感達。應念雨來。變饑饉爲豐穰。易煩惱爲歡喜。願茲恩施。曷有報償。哀民生之多艱。願具乘之卒相。俾無失望。是謂大慈。



柯山集卷四十八

祝文

祭社文

某受命于朝。來守此土。宣上之德。以保有民。社惟神之功。百世通祀。幸得以時。躬薦牲幣。徼福于民。莅事之始。敢敬致告。惟神鑒之。

祭稷文

惟神之功。立我烝民。有邠之君。實興周室。萬世通祀。光配無極。某受命天子。來長斯民。歲時奉祭。牲幣有秩。莅事之始。敢告有常。神其鑒之。永錫斯土。

祭文宣王文

惟吾聖師。生于此。又嘗仕于此。蓋自衛而刪詩定樂。既沒而葬。皆在此也。教之在魯深矣。某受朝命。來守此土。意遺風逸禮。必有在民。願與諸生究觀而講明之。莅事之始。敢不致告。非以爲禮。庶用致虔。

敬亭廣惠王求雨文四首

嗟乎吾民。其困久矣。去歲積雨。大江橫流。兩圩既隳。一境受弊。補復亡散。實在今年。死生存亡。間不容髮。

而自春及夏。時澤未滋。芄芄四郊。稻且不植。吏術莫救。必神之求。神食斯民。忍視其疾。惟王威靈功德。烜赫在民。指揮蛟龍。震作雲雨。一瞬之力。豈或難之。

山川之神。能出雲氣。見變怪。以司雨暘之權。以佐民衣食之用。則是有職于民者。故朝廷隆以爵號。表以廟貌。有司歲時奉祀不絕。自四月至今。以旱禱于王者。于是三矣。今事已益急。雖瀆神有罪。而不敢避也。惟王俯而聽之。油然而雲。沛然而澤。以除民之病。以紓吏之責。于王之神。警效之力。有職于民。宜不愛惜也。

宣之爲州。被山帶江。民耕于高。無灌溉之利。而仰澤于天。故閱月不雨。則以旱告。今茲季夏之初。時雨大至。諸山之田。旣植且茂。比日乏雨。積水且竭。亦嘗雨矣。然方作而止。又不徧也。是以民心惶惶。憂在歲事。吏無以爲術。但知有謁于神而已。夫困廩之有。將入手而取之。稗稗之食。將下咽而奪之矣。抑又神之所不忍也。

南方之民。以稻爲命。而稻非水不植。神所知也。今茲四月且盡。而原田槁乾。待水種稻。而雨不降。澗溪之流。亦復淺涸。民情惶惶。如失火之待水。寒疾之待汗也矣。今不種。則一歲且無食。其飢餓死亡。流轉于溝壑。可立而待。則其憂懼危迫之情。蓋可知矣。乃茲月甲申。嘗率僚屬有禱于神。神如答之。翌日而雨。然施澤未渥。雲日已霽。豈神未念民之病。姑以塞其意而已耶。審如是。其繼有請。雖十百其未止也。神雖欲罪其瀆而降之罰。亦未如之何矣。今事已甚迫。敢盡布之。惟立興風雨。一雨三尺。其于農事。乃克有濟。某亦

有不腆之牲酒。以報神之德。惟王速圖之。

廣惠王祈晴文

請雨未幾。又復謁晴。在人宜怒。况神之靈。沃野茫茫。歲將有秋。誰爲之孽。雨淫不收。失望垂成。吁嗟憫憂。不敢避瀆。冒昧有求。神或哀之。疾尙可瘳。

靈濟王求雨文三首

惟王昔以功德。受國爵命。袞服南面。抗儀王者。可謂盛矣。數州之民。奔走奉祀。以時不懈。積有年矣。受國爵命。則如有位于朝。食民奉祀。則如受祿于國。然則其可不察民之利病。與之同憂樂哉。今民之大憂。王亦知之矣。乃自春末至今。時雨不降。仲夏而稻不得種。一方之民。拱手而待饑饉。甚可哀也。而王之威靈。光烈烜赫。甚著。其于蛟龍。以致雲雨。且無所難。夫爲所不難。以解民之大憂。以是致禱。當在所答。今早已甚。非沛然大雨。則于農事。猶無所補也。若夫苟施微澤。姑以塞其意。而曰吾嘗雨矣。則非某之所敢知也。

水早有數。尙憂堯湯。聖無如何。矧此一方。人治其陽。數之所拘。神造數者。可得卷舒。戊戌有請。逮今未至。神之威靈。胡難其易。早野童童。塵生溝澮。神其鑒之。賜以滂沛。

自夏徂秋。謁雨于王者數矣。豈惟厭之而不答。將怒其瀆而降之罰也。某則謂之不然。求者以不隱爲情。施者以不倦爲仁。譬之君親。求則謁之。何瀆之嫌。爲之君親者。視其所求。可則與之。何倦于數。用是輒有

請于王而不疑。惟王威德烜赫。臨此一方。吏民奉事。歲時不懈。則其有請。尤在所答也。

靈濟王祈晴文

徹救旱之奠。曾未逾旬。陳止雨之辭。則已在廟。不修人事。惟神之求。罔忌威靈。其積已甚。罪不能脫。誠或可通。今茲多稼。旣成。敗于將穫。積水且溢。決則不支。始幸倉廩之將盈。俄憂父子之不保。盛德未竟。大恩宜終。夫呼而爲風雲。吸而爲開霽。于神無費。庶禱必從。

景德寺祈晴文

伏以雨旣時若。歲將大熟。而陰霖不止。水潦將增。大懼隄防之圯墮。偃滌之墊溺。欲除民病。惟賴佛乘。伏望消伏陰魔。開通慧日。拔幽沉爲明達。變苦惱爲歡謠。衆生之疾旣除。能仁之願亦滿。

祭天齊仁聖帝並城隍祈雨文

比以旱故。禱于一二神。幸時雨之沛施。免斯民于饑饉。而誠薄未格。報至不時。豈媚于神者有未至耶。抑在茲境者或不舉也。今旱旣甚矣。民亦殆哉。莫知所爲。惟有致禱。謹遣僚屬。徧詣祠宮。於赫有神。時賜甘沛。惟民與吏。皆獲卽安。牲酒馨香。將以爲報。

廣惠王謝雨文二首

禱旱壬寅。雨旣隨至。匪亟匪徐。澤此厚地。早野千里。稻如雲浮。農人笑歌。以樂易憂。哀此困窮。神德之厚。躬羞菲薄。吏則何有。我聞仁者。施不責償。鑒其誠悃。臨此一觴。

一歲薦禱。我顏則羞。神乃哀之。輒與所求。問我農夫。我田既臧。無有高卑。均爲豐穰。父子相保。保寡有依。守臣何功。神則與之。牲酒瘠酸。報微施豐。惟誠與潔。庶以薦衷。

靈濟王謝雨文二首

間者有禱。實以亢陽。神答其誠。翌日沛滂。風駕雲旗。飛澤淋漓。應龍翔嬉。妖魃奔忙。靄靄田原。萬畦齊秧。父老相慶。豐年有祥。牲酒微薄。愧升廟堂。抑神之仁。豈責報償。頃以旱故。遣吏致祈。其慢宜罰。神顧聽之。獵獵風雲。來自東南。協氣橫流。妖魃奔潛。溝澮畢通。高卑具沾。活此一方。老稚舞歌。守臣冒功。幸此時和。牲酒不腆。匪以報德。光揚威靈。傳示無極。

祭魯恭王文

惟王託體聖父。奄宅龜蒙。龍旂旒鉞。天子之容。文物焜煌。照臨東國。一有八年。榮寵之極。臨終上書。以禮自克。千載讀書。猶懷感惻。茲惟舊封。爰有廟食。荒榛喬木。薦享寂寂。時有農父。來祈黍稷。坎坎擊鼓。封豚布席。雨暘疾癘。求無不獲。愛人之心。千古不息。某具舟楫。將寄潁尾。漂泊五年。未知攸止。吾道非耶。乃底于是。悠悠天道。惑之久矣。再拜祠下。神鑒其志。行旅之薦。不及酒馘。

祭聖帝文

貶逐積年。窮無所愬。而聖上哀其不辜。復畀之民社。而來守此邦也。則亦惟是旱乾水溢之不時。將有請于帝。帝之仁民。宜無或難。莅事之始。敢以告。姑以致虔。禮則已略。惟帝鑒之。

祭文

祭成都李龍圖文

嗚呼公擇其中退然如不勝衣。而能爲人所不能爲。在熙寧初。政有大議。柄臣持之。一壓以勢。公奮力爭。與相抵刺。厥聲凜然。卒擯于外。流落十年。天子思之。歸卿太常。君子之喜於穆聖后。緝熙于學。公侍講讀。以開以覺。正位地官。幹邦盈虛。持國風憲。匪激匪紆。嗚呼公擇。孝友烝烝。祿富族親。妻孥無贏。死不能喪。圖書在箠。施于朋友。孔燕豈弟。曠無累心。清有遺味。公去朝廷。大旆高牙。孰云來歸。哭引喪車。且夜死生。不足歎嗟。善人存亡。實繫邦家。叙哀一觴。其飲之耶。

代范樞密祭司馬溫公文

嗚呼。天祚有邦。畀之元龜。篤生我公。爲世父師。夷齊之清。淵騫之德。子產之惠。叔向之直。人擅其一。足以成名。公兼衆德。乾乾不寧。九流百家。金匱石室。鈎索沈隱。裁其失得。根柢治亂。經綸皇極。作爲文章。有書秩秩。元圭大裘。望之肅然。冬暘夏冰。赴者爭先。仁英兩朝。鏗鏗厥聲。國有正人。折姦于萌。荏染者木。求直于繩。我公盡規。君心則寧。烈烈神考。體貌有德。公獻其可。巖巖翼翼。言有未用。不敢受爵。深衣幅巾。歸休于洛。公則休矣。四方顯顯。君子野人。泊于他邦。聞者懷歸。于父子兄。天施不齊。或怨寒暑。公獨何施。四海一譽。元豐末年。國有大事。穆穆文母。宥我神嗣。爰立作相。媚于神人。我公在廷。其重萬鈞。士賀于朝。民歌

于廛農慶于野兵休于邊煖爾慄寒養其飢屨無滯于饑無禾于田培其本根枝葉則茂豈曰我作憲章
惟舊於赫聖考左右上帝休公于家實遺聖子卷耳思賢夙夜周京不惑不疑成此太平公之去來人之
戚嬉人之戚嬉帝之從違豈人事耶天實爲之純仁不才辱公知深人之相知貴相知心惟公我知洞達
表裏采其所長謂或可使申結義好邱山不移匪我則然公實取之泚泚清洛獨樂之園嘉華春敷修竹
夏寒海酌愴然我招我從琅琅喜言有銘在躬朝偶乏人備位樞機入與國論獲親風規六七年間爲益
不貲私祈白首從公以歸憂勞傷生公既遭疾庶幾有瘳卒相王室國祠旣誓公以喪聞我心之悲不獲
至門入哭于室公旣大斂終天之情不一見面人生有死如旦夜耳曾子將沒知免而喜公身旣修公志
旣畢旣壽令終無有其失有如公者古今萬一任重道遠稅駕茲日庶幾念此以紓我悲猶有鬼神實聞
我詞。

祭劉貢父文

嗚呼子之強學博敏超絕一世肇自載籍孔墨百代太史所錄俚閭野記延及荒外陰陽鬼神細大萬殊
一載以身下至律令老吏所疑故事舊章在廷不知有問于子歸如得師直貫旁穿水決矢飛一時書林
衆俊並馳滿堂賢豪視子塵揮逸足奇毛不受絀羈擯守列郡吏民畏思治盜句冤不事誅斬他嚴見欺
子愛不犯中斥于南人憂子怡歸來白首晚職訓詞子之來歸亦旣疾病惟其精明猶足以永誰云如子
竟止斯耶國失君子善人之嗟方其盛時弛不得張亦旣有遭而盡其強誰與子仇敗子百方雖然今日

竟何有亡。惟我與君。同年進士。申以婚媾。兼恩與義。平生談笑。樽席燕喜。其當鑒耶。臨此酒載。

祭夏侍祭文

惟靈肯出豪貴。服膺禮義。恪守官次。志于詩書。云何不淑。奄至大故。命有脩短。夫復何言。日吉時良。安以卽路。奠觴爲決。已矣嗚呼。尙饗。

祭蘇端明郡君文

嗚呼。人生萬殊。之死同科。其間疾徐。相去唯阿。作嬪大賢。克宜厥家。婦也有茲。萬一則多。顯允夫人。簡儉純明。相其君子。險夷屢更。穆穆愉愉。何易何艱。能俾君子。卽居而安。象服委蛇。亦旣輝光。云何不淑。乃折于強。蘇公執喪。盡禮致哀。曰予德思。匪媾之懷。某等受學師門。義等族戚。矢詞殯前。侑此酒食。

祭李深之文

嗚呼。昔我先人。剛介峭峙。行于天下。得友無幾。遇公兄弟。則無間言。惟屯田君。則實同年。公時常少。多病癯然。江淮之間。相與周旋。未之兄弟。應舉姑蘇。朝夕誦習。託公學廬。公晚得官。拜公宛邱。後二十年。遇公瓜洲。相從武昌。亦旣謝仕。杖履逍遙。旁有令子。何圖末疾。百治不完。歿不得歸。卽立于焚。幽宮之刻。委于不肖。文不稱事。矧能有耀。身在罪籍。動有繫維。無窮之別。不獲往辭。寓誠薄奠。尙醢一卮。


祭秦少游文

嗚呼。少游。淮海之英。自其少時。文章有聲。脫略等輩。論交老成。衆譽歸之。誰敢改評。聿來秘書。亦旣飛鳴。

脫身亟去。事變隨生。嗚呼。官不過正字。年不登下壽。間關憂患。橫得罵詬。窺身瘴海。卒仆荒陋。君孤奉喪。歸葬廣陵。拜我于黃。尙有典刑。會葬撫孤。我窮不能。具此菲薄。聊致我誠。隻雞斗酒。懷想平昔。嗟我少游。尙肯來食。

祭晁无咎文

惟我與公。交遊之義。外雖朋遊。情實兄弟。公生癸巳。我長一歲。平生官學。何一非是。念初相遇。盱眙逆旅。一見如舊。綢繆笑語。契闊積年。俱職太學。並試玉堂。同升館閣。讀書飲酒。兩名壯年。意氣豪盛。自以無前。公之文章。瑰琦卓犖。割裂錦繡。揮磨矛槩。石渠天祿。典籍之委。過目輒誦。不復再視。我守丹陽。公鎮于齊。行世之艱。坎壈自茲。建中之初。同官于都。相對歎息。蒼鬢班鬚。我出汝陰。公守于蒲。我負重譴。責居江湖。知公金山。藝圃葺廬。最後聞公。乘太守車。往刺于淮。慶未及晝。嗚呼哀哉。九月庚寅。聞訃于陳。驚呼號天。煩冤靡伸。年且六十。非天之恨。所甚痛者。殲此善人。公素強健。無戾于身。何恙之速。一仆不振。嗚呼哀哉。平生膠漆。永隔亡存。弔不撫棺。窆不哭墳。事也多違。不敢愛勤。聊陳菲薄。侑此一樽。尙想平生。見我歡忻。至悲薰心。言不能文。



柯山集卷四十九

墓誌銘

龐安常墓誌銘

吾嘗謂醫之在天下。其資民生之用。蓋與穀帛等。竊怪世之工其道者何少也。自三代以來。至今以醫名世者多矣。其爲論說方術大備矣。又嘗怪夫世之醫者。皆忽而不學。大抵從里閭俗師。其治病苟不殺人。衆已指爲良醫矣。使孝子慈孫。不能無恨于疾苦之際者。以此也。可不悲哉。予少多病。世之醫往往與之遊。率按前人成說而用之。未有心得而能原其所以說者也。蓋醫之爲道。推本天地陰陽。經紀寒暑日星。考驗國土山川。而人身外則骨節脈絡腧穴。內則臟腑焦鬲井谷。其出入會通之變。甚多且微。非夫致至精之察。不惑之知。不足以盡之。而世醫不以術易衣食者。鮮矣。何暇及此哉。宜工之者寡。而古學之廢也。意必有聰明微妙之君子。憫茲學之不振。悼生人之疾癘。獨治其道。修其術。而莫或知之者焉。紹聖丁丑。予得罪。謫官齊安。而得蘄水龐君焉。其于醫。殆所謂聰明微妙者也。君諱安時。字安常。蘄州蘄水人。其在孕時。頗有異。乃兒時讀書。雋穎絕人。一經目輒終身不忘。鄉黨奇之。其父諱之慶。號高醫。年老且病。君問醫于父。父授以脈訣。君曰。是不足爲也。獨取黃帝扁鵲之脈書治之。未久。已能通其說。時出新意。辯詰不

可屈。父大驚。君時未冠也。已而病聾。君曰。天使我隱于醫。歟。乃益讀靈樞、太素、甲乙諸秘書。凡經傳百家之涉其道者。靡不貫通。時時爲人治病。有奇功。率十愈八九。而君性愷悌明豁。好施而廉。于是有與疾自千里踵門求治者。君爲闢第舍居之。親視餽粥藥物。旣愈而後遣之。如是常數十百人。不絕也。其不可爲者。必實告之。亦不復爲治。活人無數。病家持金帛來謝。不盡取也。戊寅之春。予見君子于斬水山中。深衣幅巾。延客坐堂上。視其貌偉然。聽其議博而不繁。妙而易曉。告予曰。世所謂醫書。予皆見之。惟扁鵲之言深矣。蓋所謂難經者也。扁鵲寓術于其書。而言之不詳。意者使後人自求之歟。予之術蓋出于此。以之視淺深。決死生。若合符節。且察脈之要。莫急于人迎。寸口。是二脈陰陽相應。如兩引繩。陰陽均則繩之大小等。凡平人之脈。人迎大于春夏。寸口大于秋冬。何謂人迎。喉旁取之。內經所謂別于陽者也。越人不盡取諸穴之脈。但取手太陰之行度。魚際後一寸九分。以配陰陽之數。而得關格之脈。然不先求喉手引繩之義。則脈尺寸陰陽關格之所起。寸四倍于尺。則上魚際而爲溢。故言溢者。寸倍尺極矣。溢之脈。一名外關。一名內格。一名陰乘之脈。曰外關者。自關以上外脈也。陰拒陽而出。故曰外格。陰生于寸。動于尺。今自關以上。溢于魚際。而關以後伏行。是爲陰壯乘陽而陽竭。陽竭則死。脈有是者死矣。此所謂寸四倍于人迎。爲關陰之脈者也。關以後脈當取一寸而沈過者。謂尺中倍于寸口。至三倍則八寸而爲覆。故言覆者。尺倍寸極矣。覆之脈。一名曰內關。一名曰外格。一名曰陽乘之脈。曰內關者。自關以下內脈也。外格者。陽拒陰而內入也。陽生于尺。動于寸。今自關以下覆入赤澤。而關以前脈伏行。則爲陽亢乘陰而陰竭。陰竭亦死。

脈有是者死矣。此所謂人迎四倍于寸口。爲格陽之脈者也。經曰。人迎與寸口皆盛。過四倍則爲關格。關格之脈。不能極天地之精氣而死。所謂關格者。覆溢是也。雖然。獨覆獨溢。則補瀉以生之。尺部一盛。瀉足少陽。補足厥陰。二盛。瀉足太陰。補足少陰。三盛。瀉足陽明。補足太陰。皆一瀉而一補之。四盛。則三陽極。導之以針。當盡取少陽。太陰。陽明之穴。脈靜者。取三陽于足。脈數者。取于手。瀉陽二。當補于陰。一至寸而反之。脈有九候者。寓浮中沉于寸關尺也。且越人不取十二經諸穴。直以二經配合于手太陰行度。自尺至寸。一寸九分之位。復分三部。部中有浮中沉。以配天地人也。又曰。中風木傷寒。金濕。水熱。火溫。病起于濕。濕則土病。土病而諸臟受害。其本年于金木水火四臟之變也。陽浮陰濡爲風溫。陽數陰實爲溫毒。陽濡陰急爲濕溫。陰陽俱盛爲溫瘧。其治之也。風溫取足厥陰木。手少陰火。溫毒專取少陽火。傷寒取足太陰金。手少陰火。溫濕取足少陰水。鄉人皆謂我能與傷寒語。我察傷寒與四溫之變。辨其疑似而不可亂也。故定陰陽于喉手。配覆溢于尺寸。寓九候于浮溢。分四溫于傷寒。此皆扁鵲略開其端。而予參以內經諸書。考究而得其說。審而用之。順而治之。病不得逃焉。君爲予言者尙多。獨著其大者。又曰。予欲以其術告後世。故著難經解數萬言。觀草木之性。與五臟之宜。秩其職位。官其寒熱。班其奇偶。以療百疾。著主對集一卷。古今異宜。方術脫遺。備傷寒之變。補仲景傷寒論。藥有後出。古所未知。今不能辨。嘗試有功。不可遺也。作本草補遺一卷。吁。其備矣。予問以華佗之事。君曰。術若是。非人所能爲也。其史之妄乎。某嘗病風痺數年餘。苦未盡瘳。君切脈曰。臟病傳所勝。君之疾。肝傳于脾。脾氣欲轉運而肝制之也。去木邪。行土氣。

而後愈。因授予以方。少焉疾有間。又曰。一方不可瘳。當增損之以應疾。時時致方與藥之難得者。察君子予盡心焉。見君之歲。是冬而君痼疾作。明年春而劇。門人請自視脈。君笑曰。予察之審矣。且出入息亦脈也。予胃氣已絕。死矣。因盡屏藥餌。忽焉韻語數句。授其壻魏淵。蓋超然達者語也。後數日。與客坐語而卒。年五十八。時二月初六也。君性喜讀書。聞人有異書。購之若飢渴。書工日夜傳錄。君寒暑疾病。未嘗置卷。其藏書至萬餘卷。然皆以考醫方之事。晚好佛學。蓋有得焉。以是年閏九月二十七日。葬于斬水龍門鄉圖佛村。君曾祖諱慥。祖諱震。及父皆不仕。娶陳氏。生二男子。曰瑾。曰琪。皆篤孝修飾。二孫曰仲容。叔達。三女已嫁。魏淵。郭迪。陳翔。其壻也。各舉進士。君臨終。以書遺予。若託以銘其墓者。嗟夫。予名微位卑。又方得罪于時。何足以爲君重。然君嘗有德于予。且其孫必以見屬。不得辭也。既銘其藏。又著所嘗治而愈。人所傳道者。更刻于碑陰。且以爲法。銘曰。

生民之病。堯舜是醫。惟周與孔。世之良師。遘癘于身。扁鵲善治。惟民與身。同一矩規。猗歟龐君。有見于茲。獨顯以方。用不大施。執疾于衷。執毒于肢。有來求予。徑取無遺。飲酒著書。終身邀嬉。欲知其仁。弔者垂淚。卽化而安。不爽厥知。有考其書。銘以昭之。

歐陽伯和墓誌銘

君歐陽氏諱發。字伯和。廬陵人。太子少師文忠公諱修之長子也。爲人純實不欺。內外如一。淡薄無嗜好。而篤志好禮。刻苦于學。安定胡瑗掌太學。號大儒。以法度檢束士。其徒少能從之。是時文忠公已貴。君年

十有五師事。瑗恂恂惟謹。又盡能傳授古樂鍾律之說。既長益學問。不治科舉文詞。獨探古始立論。自書契以來至今。君臣世系。制度文物。旁至天文地理。無所不學。其學不務爲抄掠。應目前。必刮刮根本。見終始。論次使族分部。攷之必得。得之必可用也。嗚呼。其志亦大矣。然其與人不苟合。論事是是非非。遇權貴不少屈下。要必申其意用是。亦不肯輕試其所有。而人亦罕能知君者。而君之死也。今眉山蘇公子瞻哭之。以爲君得文忠之學。漢伯喈。晉茂先之徒也。初以文忠公恩補將作監主簿。三遷爲大理寺丞。賜進士出身。勾當宿場。遷光祿寺丞。賜五品服。勾當京西排岸司。又遷殿中丞。官制改爲奉議郎。監粳米中第七界。俄權少府監丞。遷承議郎。某年月日卒。享年四十有六。積勳至輕車都尉。君爲殿中丞時。曹太后崩。詔定皇曾孫服制。禮官陳公襄疑未決。方赴臨。召君問其制。君從容爲言。事在杜佑通典甚詳。襄卽奏用之。是時方下司天監討論古占書是否同異。折中爲天文書。久未就。而襄方總監事。卽薦君刊修。君爲推考是非。取舍比次。書成。詔藏太史局。襄因奏言舊渾儀壞不可用。而後所造新儀。攷之又不合。願付君詳定。詔從之。本朝自至道中。用韓顯符渾儀。其後司天官周琮。于淵加黃道。熙寧中。舊器壞。詔沈公括更造。括以其意增損之。器成數年未能定。與浮漏景表不應。君較三家。攷古注。又自因事立制。先爲定儀表之神宗。召君問曰。浮漏以玉筒下水者當堅久也。君對曰。玉不如銅。沈括長用玉。今下水比初加速矣。上以爲然。遂以君法鑄新儀漏表。集其說號法要。其後有附括議者。訟于朝。詔再定。卒行君說。訟者亦服焉。君治官無大小不苟簡。所創立。後人不能更。其著書有古今系譜圖。國朝二府年表。年號錄。其未成者尙

數十篇。夫人吳氏。故丞相正憲公充之女。封壽安縣君。男一人。曰憲。滑州韋城縣主簿。女七人。其四人皆蚤卒。一嫁權武安軍節度判官蘇京。次嫁承務郎王景文。亦卒。次尙幼。孫一人。延世。曾祖諱某。贈金紫光祿大夫。太師。中書令。兼尙書令。曾祖妣李氏。封吳國太夫人。祖諱某。贈金紫光祿大夫。太師。中書令。兼尙書令。追封鄭國公。祖妣鄭氏。封韓國太夫人。初。文忠公以觀文殿學士。太子少師致仕。累贈太師。追封堯國公。妣薛氏。累封安康郡太夫人。元祐四年十一月甲子。葬君鄭州新鄭縣旌賢鄉劉村文忠公之兆。而憲來求銘曰。

嗚呼。伯和父。學不欺其志。而不以爲利。非不售之畏。而不知之愧。豈與世爲慙。其將有所恥。云誰之似。惟文忠之子。

商屯田墓誌銘

公諱瑤。字某。淄川人。曾祖重進。祖文俊。皆不仕。父餘政。贈大理寺丞。君登景祐元年進士第。爲萊蕪單父縣尉。臨沂縣令。知下邳縣。簽書。平定軍判官事。以尙書屯田員外郎知襄邑縣。卒。年五十。至和二年正月二十七日也。階至承事郎。勳爲騎都尉。君少博學。爲文詞豪健。貌魁傑。嚴整不可犯。而平居樂易。長者也。單父多盜。君以策鉤獵。梟絞且盡。盜怨毒入骨。罷官還鄉。次大澤中。夕有叟密來語曰。林中有惡少年十數。操利兵而伏。期今日必殺單父尉。是君非耶。君從者懼欲亡去。公執弓矢徐出。有大木去百步許。望之。中有空焉。公謂其人曰。我爲若射彼空者。再發皆中之。林中惡少年大懼。爭先遁。其治下邳決訟。多辯論。

勸說之不盡臨以法。民始鬪怒。中忽喜悟。相與請平者。常十七八。老猾吏旁睨視。不得刺手。父老弟曰。若忍犯此令乎。富韓公守青州。聞其治狀。數委公決難事。始君爲包孝肅公知。韓忠獻公器公見。必訪以世務。而公無所苟合。貴人終不肯出氣力。引挈之。其胷中不少槩見而死矣。先妻劉夫人。繼室王夫人。封壽昌縣君。三男子皆已卒。一孫求之。舉進士。女二人。曾孫一人。尙幼。公之從子太學博士倚。以元祐八年十月日。將葬公淄川萬年之原。以二夫人祔。而博士又以公之爵里行事。告于著作郎張某曰。子史官也。凡世有善而無傳。則子有罪。某不敢辭。乃爲詩使刻石墓中曰。天下平治。士無功名。才否一區之死無聲。或宏其聲。而中乃枵。竅實靡計。孰昧孰昭。有淄商公。甚畜不施。時棄其苴。則已光輝。彼不人逢。位下固宜。嗇不使年。造物則奚。

劉承制墓誌銘

君劉氏諱充。字安道。開封人。娶宗室女。補右班殿直。四遷爲內殿崇班。騎都尉。致仕。今上卽位。以恩遷內殿承制。年五十。元祐二年二月某日。以疾卒。嘗監許田。太康二縣酒稅。用舉者監眞州船場。待制李肅之守慶州。辟公隨行。又勾當安肅軍權場。用舉爲霸州船魚巡檢。徐州兵馬都監。其在霸州。卒有謀叛者。發有日。一州無知者。君獨以察得密白守。驗實斬之。微君幾擾。間罷官居京師。官府有煩使。時時猶奏遣。君至輒辦。用此能自達于名卿大官。故其居官多薦之者。其爲人勤敏。當官不避事。頗知書。矜持自喜。有足賢者也。曾祖某。某官。贈某官。祖某。某官。贈某官。考某。某官。贈某官。夫人鄧州觀察使從贄女。二子。俟。左班


殿直傑舉進士。葬開封府某縣某鄉之原。實某年月日。銘曰。
仕則有稱。既憊而休。不瑕孔修。以息茲邱。

吳大夫墓誌銘

公吳氏諱某。字德仁。龍圖閣學士贈太尉諱遵路之子也。太尉爲時名臣。公少以父任補太廟齋郎。年四十六。以虞部員外郎知郴州。罷官歸京師。卽上書請致仕。方是時。上自執政大臣。下至搢紳士大夫。凡知公者。相與出力挽留之。不聽。蓋始聞而驚。已而皆歎服。以爲不可及。相率賦詩飲餞于都門。公旣謝仕歸。蘄春有薄田。僅給伏臘。公臨溪築室。種花釀酒。家事付子弟。一不問。賓客有至者。不問賢愚貴賤。與之飲酒。必盡醉。公或醉臥花閒。客去亦不問也。客有臧否人物。公不酬一語。促左右行酒。客不得卒語。人皆愛其樂易而敬其高。凡見公者。皆欣然忘其鄙吝焉。嘗有貴客過公而飲。公酒酣而歌。以樂器扣其頭爲節。客亦不以爲忤。其放誕乃如是。平生視財物如糞土。未嘗與人較多寡。太尉薨時。其妹塔輒以家錢數百千貸人。其人不能償。公哀之。曰。是人有母。聞之。將重其憂。乃召其人諭之。焚其券。嘗有客爲公治田事。二十年。謝去。見公欲計之。公取前後文書示之。乃未嘗發封盜。夜入其家。公覺之不問。且取其被。公顧謂盜曰。室中惟所欲。大寒幸舍吾被。凡見公外者。徒知其真率曠達。至究觀古今治亂成敗。人物之賢愚臧否。其中了然甚察也。其積官自太廟齋郎至朝奉大夫。勳至護軍。賜至三品服。歷官自監西京竹木務。簽書淮南判官。廳公事。監眞州榷貨物。通判池州。黃州。乃知郴州。其治官主于忠信仁厚。故所在有稱。哲宗朝。

有薦公者。詔落致仕。赴闕。而公堅臥不起。卒年八十四。崇甯三年四月十一日也。初公感疾。卽閉閣謝藥。物至屬纊不亂。或言公少遇異人。服其藥。故壽而康甯。亦其潛德美行。不究其位。故享其報如此。公娶張氏。繼李氏。封德清縣君。三男子。曰禧。蚤卒。曰升。曰奕。皆舉進士。四女。徐暨。張之儀。徐閔。胥彥博。其壻也。是歲七月某日。葬公。蘄春縣永福鄉新安里芙蓉山。以李夫人祔焉。曾祖諱文。大理司直。祖諱叙。尙書職方員外郎。秘閣校理。贈尙書右丞。升。匍匐乞銘于譙郡張某。某熟公之名迹。且愛慕之無窮。則銘之也。實宜。銘曰。

吳公出延陵。以國爲氏。而始居京師者。自司直君。老子蘄。今其子孫遂家蘄春。嗚呼德仁。夢幻斯世。蘧廬其身。寓百年于一醉兮。不以萬物易吾之真。人何足以知之。抱所有以滅泯。殆古所謂得道逍遙。御風騎氣之人歟。



柯山集卷五十

墓誌銘

李參軍墓誌銘

公諱處道。字深之。吾先君子之友也。自言系出唐太宗皇帝。五代時有諱澄者。嘗爲梁使閩。遂居晉福之連江。故今爲福唐人。公性剛特。耿介不羣。少孤貧。自力學問。記覽淹博。工于文辭。某少時猶及見其賦篇。其文瞻麗雄放。屬比精切。一時望士皆慕與之遊。名聲絕輩行矣。五舉于鄉。中治平四年進士第。初調陳州南頓尉。更成州同谷。處州縉雲。泉州德化令。建州浦城丞。南雄州始興令。最後爲興國軍錄事參軍。以卒。令同谷時。公與轉運使厚善。知州孫京不法。欲因公自託。公不可。京怒。所以摺公萬方。卒無所得。然猶以公坐免。縉雲有女子徐。自號菩薩。家有井。詭言能治病。趙清獻守杭亦信之。嘗求其水。由此羣無賴爲倡議。聲動數州。所居成市。公怒。捕徐杖之。塞其井。初。清獻聞之。大驚。無幾何。徐氏生子。遂皆服。福建轉運使賈青繫福州衙前數輩。劾其盜督以賊。必欲論死。獄成。不引伏。公令德化。以獄屬公。公緩其獄。竟青去部。卒出之。始公知其冤。欲直之。旣而思曰。直之則青怒。必以獄他付。誰不畏青者。則此數人無類矣。姑緩之。而覲其去。卒如公計焉。浦城民有自稱徐偃王之神。頗動衆。公捕械繫之。民初不懼。猶陳說鬼怪。一邑

惑之。公以寘干法。始興嶺外小邑。前令多以富歸。公罷。無南中一物。束書而還。始與人至今道之。其在興日。公已老且倦遊矣。猶力治曹事。無所苟。數年反。重囚得免。死者甚衆。罷官。而子援爲鄂州武昌尉。迎養公于官。卒。年七十五。公性純孝。信厚。不逮事其親。每忌日。則涕泣感慕。感見于色。撫兄弟之孤。過己子。平居雖與僕妾語。必誠必信。既老且病。猶不廢書。時時與賓客飲酒賦詩。其詩句甚工。然多悲壯感慨。聞者哀之。有文集十卷。藏于家。先娶林氏。繼室龔氏。先二年卒。三男子。據抗。援。據蚤卒。抗。援。皆有文行。援舉進士中第矣。三女嫁趙僕。何頡。陳任。五孫。其二男也。以某年某月某日葬公武昌樊山之原。舉二夫人附焉。曾祖郁。故贈虞部員外郎。祖汾。故贈工部員外郎。父餘慶。故贈屯田郎中。始公與其兄載之。皆友某之先人。相好也。某嘗從公于姑蘇之學官。故公之子姪。往往獲交焉。諸孤以銘屬我。宜也。銘曰。

堯理之後。氏李子。唐宗赫赫自成紀。惟澄肯出貞觀帝。使閩不歸連江沚。猗歟深之文有斐。內懷剛方志。孔偉。六遷州縣。臨輒靡力。抗豺虎。傲爪齒。讞疑伸。枉脫垂死。械神鞭。佛破訛詭。彼民于我。我父母視。我有甚富。見無幾。豈其愛之莫吾以。樊山之藏。非其里。後望武昌自公始。

王夫人墓誌銘

夫人王氏。曾祖沔。事太宗。真宗。爲執政。號名臣。祖睦。尙書司勳員外郎。父乙。尙書庫部員外郎。庫部主簿。于咸平時。夫人年十六。丞相晏元憲聞其賢。爲子虞部君娶之。夫人家中微。起孀相門。能以禮自持。接上下有則。堂無姑。夫人宰家室。內外無不允者。元憲嘗曰。吾無憂矣。夫人寬裕而好禮。簡儉而樂施。夫族有

負市易錢百萬者。夫人爲出所有償之。次子方提孩。其伯父以爲己子。奏得官。後伯父失官。子未官。夫人曰。吾子可教。取補牒還之。以虞部升朝。封春安縣君。又以長子恩改封崇德縣太君。而元憲薨。時仁宗臨奠。面賜冠帔。生三子。長某。朝散郎。次藻。先夫人卒。季銓。左班殿直。監黃州酒稅。樂善好學。敏于爲吏職。從子遊甚善也。方夫人疾革。銓嘗剖股肉以進。三女。長嫁某。次嫁某。孫男十一。王氏舊爲霸州文安人。自司勳始居開封之咸平。今爲咸平人。以某年某月葬潁昌陽翟舊學鄉。合于虞部之墓。銓求銘于子。銘曰。隱而聞于顯。微而立于貴。吾何爲哉。終始吾義。有子而孝。歸從其良。儀爾山川。德音不忘。

福昌縣君杜氏墓誌銘

某先君之執友曰長沙李公諱竦。與先君生同年。其應舉得官。遊宦四方。禍福淹速。多相似也。某爲兒童時。兩侍先君。遇公于京師。其出入遊處。必相與偕。其議論談笑。率常自旦至夕。繼之以夜。其僕役至。憊言不能支。而兩公未嘗倦。某時竊聽之。則其是非好惡。十嘗同八九。已而別去。則兩家之書問。必以時至。蓋李公之與人。其傾倒言笑。若無不可。而于節義廉恥之際。其彊禦甚嚴且固也。先公前公且十年歿。而公晚稍被任使。屢使諸部。卒以無所附離。不大振顯也。元符二年。某得罪謫官黃州。而公子之子廷老寓書狀。以其母杜夫人之行來。求銘其墓。蓋後公之卒。又十餘年矣。嗚呼。先君同時之人盡矣。昔之兒曹。皆已斑白矣。而某又得罪聖世。幽憂無聊。不得齒于平人。其閱人之盛衰存亡。未嘗不動心悲懷。不能自己。其尙忍聞其不幸而銘其墓哉。雖然。不可已也。姑次序其狀。夫人洪州人。天章閣待制諱杞之女。天章在仁

宗時。號有風力名臣。夫人生貴家。自幼嚴飭好禮。不妄笑語。天章公爲擇對久之。迺以歸李公。而姑朱夫人老且病。又素剛。人少能中其意。而夫人在旁。輒歡。公之弟妹未婚姻者。夫人出所有爲成之。無所愛也。李公素貧。不治生事。夫人爲均節。其有無以濟。由此李公之仕宦。得以直己行義。而不累于私。以李公登朝。恩封某縣君。既寡居。乃歸心于佛。奉其教。讀其書。若有得焉。紹聖五年十二月二十八日。終于道州。司法參軍。楚老之官舍。年七十。曾祖某。某官。祖某。某官。二男子。長廷老。衡州衡陽令。次楚老。四女。嫁太博學士虞賁。福建轉運判官檀宗臣。大理正張近。衡陽縣令關沅。孫男女十有六。以元符二年十月。合葬夫人于荆門軍長林縣白陽鄉李公之墓。銘曰。

惟婦之德。順以莊。既莊而和。順以方。夫人蹈此有耿光。而享不豐。後其昌。

李夫人墓誌銘

故大理寺丞王君諱恣之夫人李氏。真定人也。司空贈尙書令韓國公諡文正諱昉之曾孫。金部員外郎贈禮部尙書諱宗諒之孫。工部郎中天章閣待制贈太尉諱邁昭之子也。夫人年十有八。歸大理君。性純孝。敏靜。奉事舅姑。能先意集事。飲食衣服。非經其手不以薦。而舅姑亦曰。非新婦所爲。吾食不甘。服不安也。宗黨相教以爲法。夫人之舅。與其從弟同時拜天章閣待制。從弟家治黃金帶爲燕服。夫人顧舅家貧。不可得。悉其奩中物。易金作帶。藏之。待制出守陝州。盛服燕客。夫人出帶使大理君獻之。而家人初不知。與其夫處如賓客。骨肉有不至。必面規切之。退則更譽其善。故聞者信而不怨。大理君通判夔州。卒于官。

一男始生。夫人獨護其喪。還京師。道峽中。舟敗。舟人捨舟而逃。夫人正色叱之。命取柩挈兒。以免。然家無長男子。道遠。從者慢夫人。輒能言之。官府鞭罰之。以寡婦行艱危。數千里無敗事。而內外始知其才。非獨辦夫人常職而已也。既寡居。杜門。雖父母家。至有時留之宿。不可曰。吾非間吾親。顧年少子幼。理可畏也。子長。躬教督之。慈而不驕。于以有立。今丞相范公之配英國夫人。大理君之妹也。英國幼時得危疾。久未平。夫人晝夜調護。有恩意。英國歲時躬省勞之。良厚。以相府恩。錫夫人命服。元祐四年。夫人年七十矣。得疾。不肯御藥物。家人固勸之。夫人曰。吾無不足者。又獲託死于英國。求生何待也。左右趣爲我沐浴更衣。遂卒。五月二十四日也。一男曰約。宣德郎。四女。長嫁隰州錄事參軍劉損。次嫁奉議郎權通判火山軍葛繁。次蚤卒。次嫁殿中丞鍾離景圭。前卒。是歲六月七日。合葬夫人于開封府開封縣大邊村之原。大理君之墓。誰郡張某曰。嘗讀太史公書。見其爲滑稽。日者作傳。而不著列女。孔子叙詩首關雎。著后妃之德。夫女德。王化之本也。豈小補哉。願隱沒不稱。而賢賤士末術。于勸善未至也。惟夫人之德之才。其于死生之際。蓋知之矣。此士大夫之所難。而可以無傳乎。于其葬也。而銘之曰。

張夫人墓誌銘

中散楊公諱希元。夫人張氏。亳州譙縣人。贈禮部尙書諱成之曾孫。禮部侍郎諱傳之孫。贈太常博士諱彭之女也。夫人秀美惠和。治女工精工絕人。內外宗族無與比。蚤孤。母燕夫人篤愛之。曰。有男子如吾女。

者。乃以歸之。媒灼日走門。燕夫人輒揮之曰。吾女非若輩偶。時中散公與夫人之叔爲寮。來請婚。燕夫人素聞中散公賢。又竊奇其狀貌。爲有福祿者。曰。是足以當吾女矣。遂歸中散公。夫人既歸楊氏。其宗族敬愛之如一。夫人仁愛慈淑。出天性。柔聲怡色。無絲毫忤人意。其于妒忌。生不知有也。年尙少。能淡世慮。齋戒奉浮屠。不治婦女玩好。年三十六歲感疾。少間。召其家人婢妾環坐。酌酒飲之。勸撫之如他時。皆喜曰。吾夫人疾且起。俄而正衣起坐。家人驚問之。已卒矣。後二十七年。當元祐三年。而中散公卒。諸孤迎夫人之柩于京師。是歲九月丁卯。合葬鄭州管城縣懷恩鄉神崧里先塋之次。始以中散公登朝恩。封壽昌縣君。追封清河郡君。子四人。彥真。彥齡。皆宣德郎。彥臣。惠州吉鄉縣令。彥章。絳州太平縣尉。五女。長嫁左班殿值李祐。次嫁左藏副使曹譜。次嫁朝奉郎程復。次嫁大名府魏縣主簿王需。次嫁河南登封縣尉李昂。孫八人。長達。次邁。皆太廟齋郎。餘尙幼。夫人于某爲從姑。故諸孤屬之銘。銘曰。擇所宜從。初艱其歸。既逢其良。身先之萎。匪謀不臧。天實戾之。於穆夫人。令德婉婉。物皆恒終。獨裕其返。惟昔弱子。衣冠頎頎。逾二十年。以喪而歸。鮮原靡靡。從于君子。有蕃其承。視此松梓。

王仲儒墓誌銘

河南王嬰者。齒少。篤于自修。好學而能文。予聞之而未見也。紹聖四年。予以罪戾謫官齊安。一日有客墨衰造門。視其調。嬰也。見予則泣而言曰。先君與子舊矣。嬰不幸。既孤。將葬。而無詞以刻先君之墓。敢以是屬諸子。某曰。予嘗見朝奉君子京師。其深者某之陋所不敢知。而其粗。與夫衆所譽者。竊聞之矣。不曰篤。

躬好學而廉儉者歟。敏于爲吏。愛民徇公。直己不撓于權者歟。然其人厚于實而薄于名。豐內而廉外。世之君子。未必知之。予嘗辱聞焉。則屬銘于我固宜。謹取其爵里行事叙之曰。君曾祖諱恪。西頭供奉官。祖諱淮。越州諸暨主簿。贈太常博士。考諱起。尙書屯田員外郎。秘閣校理。贈左中大夫。君初補太廟齋郎。調陝府湖城縣尉。又爲灑池安邑二縣主簿。河中府猗氏縣令。改宣德郎。監解州鹽池。兼知縣。覃恩遷通直郎。賜五品服。知孟州溫縣。遷奉議郎。加武騎尉。管勾京北排岸司。遷承議郎。加雲騎尉。監京米倉。遷朝奉郎。知德州。加飛騎尉。紹聖三年五月二十六日卒于官。享年五十。以某月某日。薨奉君之喪。葬于河南府某縣某鄉某原。以夫人楊氏李氏祔焉。銘曰。

君諱仲儒。時中其字。世河南人。河清其里。以蔭筮仕。湖城是尉。湖廢官罷。留君一歲。實惟相絳。從湖民志。其在安邑。涌水于野。邑人走祠。君鞭而罷。後令猗氏。有愛其民。既去十年。見之如親。實其耆老。以謂子孫。民居侵達。使者議毀。君舒其苛。一道是賴。安邑賈鹽。民富悍豪。君教之學。獎禮其髦。孝秀聿興。鄙悖滋消。西民僻師。履產輸泉。君力弛之。鰥寡用安。令溫治盜。曰姑安之。勿浚其姦。吏逸民嬉。盜悔而耕。厥壤大滋。邑豪坐獄。重賄而逸。君以奇購。唾手則獲。君之去溫。其民涕留。耆老百千。聲言于朝。惟河內溫。邑聯部異。河內有請。假君決事。後守德州。河溢而驚。羈民流殍。所活萬數。伍長悍驕。其將笞之。長以衆逃。斥將之疵。君請長叛。立實于罪。貸將不問。境爲無事。一時持權。爭欲用君。勉之比周。君爲不聞。云何不淑。五十而債。君凡三娶。皆有婦道。粵初氏楊。其父日憊。繼李父周。學士集賢。今夫人陳。姻黨稱焉。劉時張闔。又楊克中。

增其三子。惟德之同。君三男子。惟雯在耳。進士登科。甚飭而藝。陶牙之原。鬱乎松楸。乘者下之。君子之邱。

吳天常墓誌銘

公諱天常。字希全。河南府洛陽人。惟吳氏之先。與周同姓。至越入吳。子孫散居四方。以國爲氏。公自祖考始。占籍河南之洛陽。公少貧。不治生產。以氣節自許。力學問。河南大府號多士。而公自少已知名里中。而舅建寧軍節度使王正倫深器之。以正倫死事恩。爲郊社齋郎。調濮陽縣主簿。又調舒州司法參軍。郡大猾章氏數犯法繫獄。其勢能得于有司。公論正其罪。流之一郡。畏伏。遷泗州盱眙縣令。守筇病人死。公當覆驗。而前驗官言死者不病。公將直之。守以利啗公。欲得如前驗。公謝守曰。我受公恩固善。如死者恨何。卒直之。守爲得罪。知洪州奉新縣。奉新號難治。訟者或先以釘貫其足。以脅有司。公畫巨釘于市。令之曰。釘必如此。則受訟。乃稍變俗。知彭州永昌縣。轉運使范公純仁深知公。是時方變差科爲免役錢。公原究蜀役法利害。講之至精。後以書見王荆公。荆公召公議于司農寺。時欲舉江西役法行于蜀。公曰。蜀不足于地。江西不足于民。利害異宜。恐不可行。主者是公議。久之。公所陳浸忤。遂罷歸。審官調院。簽書鎮南軍節度判官。丁母憂。服除。以便親。調蘄州蘄口鎮都大監轄。俄丁父憂。服除。通判無爲軍。公諷軍守與庠序。勉士以學。部有礬池。官專利。民多冒禁。公爲立法。公私便之。而犯者鮮。改通判鼎州。以朝命按知誠州。周世隆。帥司部使者皆欲致世隆于罪。公言世隆習蠻事。且未嘗有罪。論執甚堅。卒免世隆。人以爲難。辰州有軍事。以公攝守。公之官。見屬縣吏。部夫千餘。挽木山間。公曰。方春役民。妨農耕。悉罷之。公至郡。蠻酋繫

獄者。公諭以朝廷德意。盡遣之。皆感泣而去。公因言自誠州抵融州道新通。請每三十里建一佛寺。擇僧知蠻情者居之。諸蠻信佛。平時可使入蠻。與之習熟。有警可用以間謀。而佛舍可因以儲糧。其利邊甚大。朝廷許之。後爲諫官。言不當廢誠州爲軍。公言頃蠻所以數叛者。蓋雖輸款而未嘗去巢穴。一失撫循。則亂稍內徙。則定矣。雖不致州尙可安事。廢州乎。是時方議役法。有訪公者。公陳二事。謂州縣之役。莫重于衙前。今雖易雇爲差。衙前數之多寡。與役之優重。請守熙寧元豐之舊。毋輒改。又言鄉差于官。類不知書計。勢必雇人代者。必要厚價。請官爲立直。又言縣所積免役錢。請省納州。或輸旁郡。戶部皆奏行之。用薦者除知宿州。時荆門新復軍。擇守。乃以公爲知軍。宰相召公諭以擇才之意。軍久廢。百事圯毀。公至爲興起。弊敗必使完好。可持久。不爲苟且計。人至今頌之。俄知沅州。其去荆門。人爲立祠。歲時父老率子弟拜之。公旣習知蠻情。其治沅務安靜。嚴守備。撫溪獠。久之。奏請出巡邊防。軍行有告帳下謀變者。公獨保其不然。罪告者卒如言。又檄諸縣案使察游民。與蠻交易爲嚮導者捕之。俄復知辰州。公去沅如去荆門。而辰之吏民與蠻酋皆相賀曰。我公復來矣。蠻相約無犯邊。郡爲無警。辰民春夏多疫。公飭醫工親視藥物。人賴以全甚衆。乃立學校。勸以讀書。人皆服從。風俗爲變。朝廷旣知公有功南邊。將用之矣。以病求告。卜居蘄州金沙溪上。家藏書萬卷。有以自樂。泰然也。公喜讀書。于書無所不觀。自少至老。未嘗一日廢卷。至其閒居。好之尤篤。有詩集三卷。奏議三卷。紹聖四年八月六日。以疾卒。預治終事。至屬纊。精爽不亂。享年六十有一。公曾祖諱延慶。祖諱澤。皆不仕。考諱英。以公登朝。恩授大理評事。累贈朝議大夫。三男子。長

忱。太廟齋郎。仲惇。未官。季悟。假承務郎。皆以進士知名。三女。長嫁萬載縣令黃公孺。次嫁進士胡世南。季嫁寧州錄事參軍譚康世。公自濮陽縣主簿積官至朝奉大夫。積勳至杜國公。爲人厚重寬博。達于爲吏。官無大小。所臨必有績。當其有所建立。必得所欲而後已。或以利害怵之。不顧也。其仕宦多往來南邊。故深知溪洞諸蠻。所以治亂。有所措置。後不能易。然攻其大體。本于安靜寬簡。不爲苛擾。而頗立隄防。明條教。期無亂而已。不徼有功也。君子韙之。公少嘗從丁寶臣學。寶臣異其才。薦于歐陽文忠。文忠稱焉。既仕。則不苟取知于人。而一時賢公卿咸知之。獨吳正憲知之尤深。而公自重不輕就人。故雖知之不絕出力。而公才見于世者如此而已也。其孤將以元符元年八月二十有一日。葬公于蘄春縣安平鄉黎企里。啓先夫人之兆而合焉。夫人程氏。有賢行。封文安縣君。前公二年卒云。銘曰。其直非以爲許。其和非以爲悅也。獨盡力于爲吏。無劇易必達也。其至民以爲賜。其去民以爲奪也。旣或知之矣。乃揜而不發也。進齋而退果。而後知公之節也。安平之坵。公藏惟列。尙語後人。洛陽之吳也。

潘奉議墓誌銘

齊安有君子曰潘昌言。其學也正。其言也文。其家居篤于孝悌。其爲吏清介刻苦。而爲政本于惠下愛民。至大吏。勢力能寒熱人者。必與之較義理。一毫不爲屈。其爲人務內而簡外。信己而不求人知。而人之知者。必皆誠心愧服焉。嗚呼。君子哉。蓋紹聖丁丑歲。某得罪謫官于齊安。曰。幸得從君遊。旣至。而君病矣。無幾。河而卒。實元符元年十月某日也。齊安之君子皆相弔。已而又曰。潘君之墓。宜有銘矣。咸以銘事屬某。

某既素高君之義。用不復辭。走其家哭之。求其世家。歷官行事于其子大臨。而次叙之。曰。潘氏在唐爲榮陽人。當僖宗時。有名季荀者。仕爲太僕卿。官于福州。避亂。因家焉。季荀之弟曰季勣。爲太子司議郎。季勣後二世生吉甫。事吳越入朝。終國子博士。累贈工部侍郎。侍郎生衢。爲屯田郎中。屯田嘗官于黃。遂居之。屯田生處士革。隱德不仕。君諱鯁。字昌言。處士長子也。生而儻警絕人。爲兒時。賦詩已有奇語。閩有周希孟者。博學篤行之士也。君從之學。希孟以爲盡己之道。君居鄉里。以經教授。聚徒常百餘人。後進皆師尊之。登元豐己未進士第。初調蘄水縣尉。遷和州防禦推官。知江州瑞昌縣。監楚州都鹽倉。遷吉州軍事推官。改宣德郎。監漢陽軍酒稅。遂以奉議郎致仕。卒。年六十三。蘄水民有以花爲獻者。君一嗅而還之。曰。受賜多矣。其廉潔類是。江州賦屬縣。鸞建茶。太守問君。瑞昌歲可售若干。公曰。四斤耳。守驚詰其說。君曰。縣小民貧。米鹽猶不足。而暇及茶乎。獨縣僚四人。人一斤可矣。守悟。以故諸縣皆得無多售。而旁郡有賣千斤者。後七年。君以事過瑞昌。有兩民拜馬前。其一曰。異時君爲縣。我認得直。其一曰。異時君刑我當罪。我心服。是以偕來。君之爲吏得民舉如是也。元祐赦民負官錢無姦者。悉免之。吉州通判攝守事。乃悉下負者于獄。將鞠其姦。君曰。赦欲寬之。而君故獄之耶。執不可。民乃得免。龍泉令捕得私酒三十家。將上府。君謂令曰。是法皆當徒。龍泉小邑。一日徒三十人。君爲令安乎。令乃頗減出之。嗚呼。其歷官微而見于行事者寡矣。然其修身治人。立心操術。亦可概見矣。向使之得富貴。立朝廷。據位操柄。以行其義。達其道。其不貪利苟得。如還蘄水之花。其忤上愛下。如露瑞昌之茶。民甘其罰。如瑞昌之拜者。則雖古之君子。無以加

分寸于此矣。有集三十卷。曰春秋斷義者十二卷。講義者十五卷。易要義者三卷。致仕時家無一金。骨肉衣食僅給。而君蕭然病臥一榻。口不及俗事。時與其子清言而已。娶何氏有賢行。男二人。長大臨。次某。皆力學有文。一女。嫁進士羅啓宗。四孫。其一男也。曰憲。以某年某月某日葬某縣某原。銘曰。白璧芳蘭。包以九襲。長于外者。千萬而一。莫爲出之。卒殞無施。嗚呼昌言。不幸類茲。致美在裏。不耀于肌。豈人是謀。謂天實知。黃岡之原。松柏其猗。我相後人。將穫其苗。

柯山集拾遺卷一

五言古詩

有所歎

達士不可羈。其次遠羈絆。我無達人風。又不能自遠。紛紛隨世俗。碌碌走薄宦。其來或遭驅。其去或被挽。吾求亦何有。五斗固易辦。不師陶淵明。腰爲小兒俛。由來爲貧仕。榮辱何敢辯。乘田與委吏。孔子不云賤。

卽事二首

大明海底生。先警我東牖。老人雖未起。曉境默相授。山前羣動寂。暗樹語鷓舅。昏昏橫水霧。落落欹曉斗。廚人已束蘊。汲井鳴盎缶。沽酒走家奴。理食咨寵婦。悠悠春復冬。冉冉昏還晝。通塞付大鈞。聊安此微陋。囂塵屏繁務。幽獨會夙心。惟時孟春月。微祿歸園林。下有宋微逕。上有知時禽。終日自嘯歌。寂無鄰里音。冉冉溪日下。悠悠山靄陰。興闌下絕巘。新月出遙岑。

晨起二首

仲春忽過半。長養候已深。晨興雨初霽。近日矚平林。繁桃張麗錦。好鳥鳴清琴。樛枝有新子。翹草無陳心。謫官傷局促。端居厭滯淫。眷言平生友。乖隔如參辰。

窮居無遠念。暇日親庖廚。澤國富滋味。春江出嘉魚。鬻市有懸羔。擷園得嘉蔬。雖無五鼎烹。薦俎頗有餘。導和資一杯。徑使愁肺蘇。條味以實氣。聊以彊吾軀。聖賢戒求飽。豐德任形臞。彼皆勤勵智。我獨懶求愚。

晨興

喔喔雞向晨。夙興鄰里靜。朝光出東崗。秋曉氣耿耿。亭亭脫樹葉。寒意已疏勁。草根有微露。醴綠尙交映。老夫起默坐。覽物感衰盛。忽然遇杯酒。酣歌朝達暝。

朝日

朝日照山堂。流光泛疎牖。龍鍾病童子。掃地起持帚。堂中空四壁。惟一老病叟。蕭條野僧閑。鄙樸老農陋。雨來林葉響。霜近蔬甲瘦。何以遣幽憂。賴有尊中酒。

晨起有感

故歲如曉客。行意不可留。新春如美人。含笑未舉頭。定知當粲然。有待姑少留。山川謀光景。梅柳露風流。惟有堂中人。一衲暖蒙頭。榮枯不到心。萬事良悠悠。

東池

東池秋水清。歷歷見沙石。枯荷半倒折。風起鳴撼撼。悠悠岸邊菊。灼灼好顏色。芬芳人不知。寂寞聊自得。寒蛩白日啼。晚葉霜餘赤。無人野竹繁。積雨平橋側。嚙啜雲閒鴻。歲晚霰雪迫。乘閒輒獨遊。官閑幸無責。

東溪

東溪何潺湲。秋水清見底。縱橫小石圓。一一靜無滓。空山人不到。澗澗響環佩。我來每終日。漱濯弄清泚。山居時已久。不省有朝市。門闌人客少。跨馬必至此。麋鹿見我熟。相對不復起。誰知寂寥趣。寄言同聲子。

薰風

薰風動嘉樹。日夕成清陰。上有枝閒鳥。知時爲好音。陽春事已往。桃李不可尋。賴茲長養功。嘉實薦中林。庭虛納涼吹。雲表見遙岑。我歌虞氏詩。諧此風中琴。

六月五日苦暑

朱夏忽云季。金流火方燃。遲遲朱輪出。濯濯高雲鮮。困翮守茂樾。游魚伏深泉。炎炎萬物息。聒耳唯鳴蟬。白羽誠么麼。爲功諒徒然。那能解煩促。揮肘增勞煩。大鈞播一氣。寒暑遞徂遷。欲逃旣無所。聊此北窗眠。

六月八日苦暑

微颺不振髮。皎日沸重淵。萬木奪華采。祝融方燎原。青山瘁無姿。流泉不復寒。眷彼道路子。念茲農畝勤。荷鋤詎敢後。擔囊無息肩。亦知苦可畏。謀食敢遑安。三伏方肇序。金融未能完。聊安環堵居。酌彼溪中泉。

又

羲和午停車。草木靜若萎。我居倦煩促。誰與開我懷。出井泉失冷。迎涼幌空開。翩翩投林羽。仁哉林閒風。爲我時一來。惜哉爲功薄。隆赫安能迴。觀濤感巨壑。清嘯想高臺。徘徊滯心賞。怡然忘世憂。

秋興

八月禾黍熟。登高望川原。山河豁清霽。風日開明鮮。晴光散草木。餘爽厲淵泉。飄飄孤飛鶴。擊搏無留拳。幽獨感搖落。端居驚歲年。誰爲知心者。賴有濁醪賢。

又

秋日照荆榛。空山莽蕭索。人稀雞犬閑。古道轉城脚。旗亭數家市。炊烟起籬落。牛羊暮求羣。歸鳥紛落泊。菅麻已在漚。黍稷行可獲。歲豐農工勤。膏火通夜作。嗟余何爲者。愧與衆同樂。南畝亦易謀。咄嗟我力薄。

又

寒日在東屋。鄰家晚雞啼。闌班黃葉地。白日蟲鳴悲。揚揚舊香草。白露彫華姿。雖悲就搖落。所喜實離離。幽雅斂衣食。備寒戒先期。薪芻旣收斂。酒醴亦時施。嗟我無一廛。薄游倦東西。眷言及農畝。歲晚空咨嗟。

搖落

搖落已可悲。况復值春晏。山深雲物陰。所向皆慘淡。疎枝綴陳葉。風至時一散。壞壁畫蛩啼。衰草飛蟲戀。嗟余守窮谷。秋物已三見。胡爲久淹留。不自厭貧賤。由來人間事。利害喜相半。優游歸隱約。富貴足憂患。安行吾不迷。夷路坦可踐。保此頑鈍姿。悠哉復誰怨。

九月一日有作

怳怳日光薄。蕭蕭風葉吟。今辰九月朔。秋物半侵尋。賴有堂下菊。芬芳散浮金。感茲搖落際。採擷慰孤斟。木落見南山。池清照疏林。翩翩短羽健。杳杳潛鱗深。落漠苦無趣。屢空阻抽簪。清明躡吾履。晚歲多重陰。

觀池漲有作

清商初用事。力弱殊未完。假此通夕雨。遂收祝融權。平池舊深淺。亦復波浪翻。白鷺飛不下。高荷沒青圓。是日酒初熟。芳香滿金尊。三酌徑就酌。此懷誰與論。

七月十日雨炎暑頓解有感

空山風雨夕。微雨淒房櫺。徂年兆搖落。感歎白頭翁。謫居因炊玉。無田願年豐。欲持一杯酒。旁舍慶老農。烈日辭紈扇。高林墜晚風。清燈夜齋靜。不睡獨聞蛩。

出伏調潘十

伏盡熱隨盡。古語常有憑。淮南歲苦旱。秋暑鬱方蒸。老火熾而餒。弱金融未凝。火雲大江沸。烈日羣山頽。平生白羽扇。揮拂何功能。蓬頭臥永晝。起冠汗沾纓。柯山屢空子。貧病復相仍。衡茅未可詣。作詩問寢興。

九月下旬有作

今辰九月末。秋物能幾許。翩翩風中葉。卷卷自飛舞。餘姿不復妍。日夜逐塵土。寥寥空枝高。但有寒鳥聚。天時不汝留。變化竟誰主。今古無奈何。悲歌徒自苦。

又

慘慘歲云暮。寒日無停光。况復陰晦多。景短重雲長。梳頭坐清曉。朝飯熟黃梁。官閑無事業。終日偃空堂。經時不跨馬。門徑秋蕪荒。惟有霜後山。當簾對蒼蒼。

白月

白月照世界。山河受清光。豈獨耳目清。瑩洗肝膈涼。中夜掃寬虛。仰得天一方。湛碧磨青銅。精金點星芒。我心方無思。偃息在高堂。慎勿憂世故。彼昏謂汝狂。

初晴對月

平生愛明月。豈以解煩燠。及茲霜夜對。任使體生粟。冰天凝紺冷。氛祲避不觸。煌煌七金徽。但掛寒斗曲。蕭蕭翳栖葉。悄悄斲眠屋。三更清到骨。亂以杯中綠。

雨中晨起

端居多滯念。秋至一蕭散。况茲炎涼異。微冷風雨旦。空山陰鶴積。槭槭木聲變。絺衣感輕單。素褐催補綻。泥行苦長鬚。買酒不可緩。洗醜自迎門。一杯聊自勸。

苦雨

春淺天尙寒。雨多聲入夜。幽人不出門。坐惜梅花謝。庭竹未抽萌。醅釀將覆架。芳時喜病愈。淺酌供情話。趨世劇曳牛。投閒如噉蔗。因逢老農談。悔不初學稼。

雨霽

滯雨忽雲霽。園林有清暉。時鳥亦和鳴。好風清且微。遠愧深山僧。趺坐掩禪扉。豈知芳菲歇。詎傷寒暑違。一念與道寂。九旬淡無爲。臨心探斯理。吾今其庶幾。

賀雨拜表

羣雲雨事畢。振旅不復陣。掃天無一塵。千里還綠潤。晨朝大明賀。沙路萬蹄印。朝光泛翠瓦。佳氣去人近。頗避斧辰口。侑膳飯龍筍。願君愛物心。從此至堯舜。

春雨

南山多夕陰。夜雨復達旦。瀟瀟脫未已。零落雲物亂。陰沉晝生寒。閉戶守餘炭。官庭草木合。山吏午已散。悠悠對朝景。念此春已半。昨日櫻桃花。紛紛落如霰。天時不可駐。今古一嗟嘆。唯應痛行樂。此計乃最善。簪紳束我體。局促困游宦。何當有茅屋。放意行所願。

春雨

春雨不肯晴。春雲與地平。柯山數椽屋。晝夜傾簷聲。陰沉人意惡。但願醉不醒。國花知在亡。渠溜飄紅英。今年窮到骨。憔悴客江城。花時不得出。風雨掩柴荆。自我學道來。萬事一羽輕。惟有惜春意。未忘兒女情。齟齬可奈何。努力飽飯行。往日雖莫挽。來日豈無程。忽記祖燕公。佳句與帝廣。今歲隨宜過。寒食。明年倍調作清明。

喜雨止

敬亭與吾期。今日雨當止。靜掃峰頭雲。秀色粲如喜。我慚無以酢。國逕欣細履。夜來四簷聲。添我北池水。破圩久不補。積潦蓄其址。南人麥禾薄。稻壠魚尾尾。豐穰未敢望。疲餓何由起。飽食但高眠。自慚稱刺史。

仲春苦雨

仲春乃積雨。和景良未舒。園林阻幽步。塊坐守溫爐。中庭下水鳥。隙地長寒蕪。流紅委花外。溷碧漲池餘。商羊未悔禍。椒醕屢傳巫。豈惟政無補。多慚誠未孚。農事滯南畝。土功墮敗圩。悠哉欲何奈。濁酒且爲娛。

苦雨

重雲冒山椒。大江浸其麓。通爲一沮洳。哀此塗泥渥。居寄佛殺山。□趾厭局促。餘飄汗巾几。積潤繁篁竹。門前耕野靜。時得舒倦目。美哉百畝稻。整整照人綠。深蕪下白鳥。霽嶺明秀木。感此歌豐年。卒歲期飽腹。

苦雨

伏盡暑初變。西風作秋聲。瀟瀟晚雨急。達旦聲不停。陰暝雞失警。微涼肅晨興。湍流冒階闕。積潦被門庭。仰視天蓋低。玄雲送驚霆。黑蜨樂以逞。商羊方未甯。后土何茫茫。流潦浩縱橫。憂念在民食。敢私蘭菊榮。漠漠暮未雨。琅琅夜還增。嗟余但高枕。飽食愧疲氓。

春旱二首

大野拱連山。晴空轉規日。青春散塊奔。積水中蕩瀟。欣欣見羣動。咄咄爭湧出。滯留無好懷。風景獨蕭瑟。離羣與誰語。塊坐守蓬華。卮酒樂餘春。沉憂畏生疾。

又

風雲閉益高。旱色起諸嶺。施生澤未渥。曉氣挾餘冷。飛沙礮桃李。碧草思耿耿。麥根不走地。稻壩臥陳梗。

蛟龍且儉安。雷電勢欲逞。憫農非我事。剛復念閭井。

春雨

浪浪簷前雨。晝夜來不極。青苔生空廊。蝸涎被四壁。出門無所往。端居守籠翮。嗚呼林中鳩。聒聒方自得。林花掃餘姿。高柳沐佳色。悠悠三月殘。春物行欲息。感之欲何奈。取醉遣朝夕。穿泥得新筍。紫籜裹新白。從容婦子語。草草田野食。明日還復然。情頑已成癖。

春旱初雨

春泥不沾犁。四月若三伏。哀哉麥無秀。父子墮頭哭。誰驚耽耽龍。霹靂震萬屋。從空倒江海。焦禍快一浴。終然霽威怒。飄颻斷還續。晚陰涼觀闕。夜響起松竹。後時悲夏穫。入土喜秋穀。聊爲目前慰。未敢信果腹。豐凶繫口詳。望歲走牲玉。我無憂民責。理此杞與菊。

庭菊

窮秋慘無姿。向口盡枯槁。可憐中庭菊。灼灼顏色好。豈無風霜苦。所守良自保。清商振驅除。爾獨傲百草。煌煌中央色。嚴麗謝浮姣。山家有薄酒。爲爾數傾倒。嘗聞仙人術。採餌庶難老。呼童掃藥齋。遲爾寒英擣。次韻蘇翰林送黃師是赴兩浙

昔見君納婦。今見君抱孫。先公力種德。子合大其門。何爲亦如我。有抱不得言。崢嶸胸中氣。默默自吐吞。誰如東坡老。感激論元元。欲將洛陽裘。盡蓋江湖村。旣係海若頸。又鞭江胥魂。意令仰天民。不隔頂上盆。

我獨乞禪牀。一氣中夜存。

次韻子夷兄弟十首

暑雨衆物成。園林粲垂實。官閒廢歲月。裨補百無一。委身作書蠹。檢姓就僧律。古味雖未亡。塵埃滿琴瑟。
金馬聊代耕。淺郎亦爲官。何必歌五噫。遭非如伯鸞。物生各自途。蕭艾與芝蘭。詩人亦多事。屑屑計鶉貍。
惜惜坐歲晏。忽枉故人書。頗說清淮濱。卜築有幽居。歸興浩滿懷。端如投狙。功名繫遇合。不遇欲何如。
出門復入門。愧此櫪上馬。壯心磨不盡。撫劍還悲咤。感時高歌放。泣古幽淚洒。端憂蹇無成。覩言我心寫。
少年初入路。見謂醒日少。春風牡丹市。走馬帽簷倒。知音君伯仲。騏驥與腰褭。五年復相逢。但怪酒醜小。
經時不飲酒。塵薄入口衆。人閒多是非。不敢盜鄰壺。二公洛陽日。想見飲屢痛。行求放湖海。種秫代官俸。
閒宮冷于水。塊坐守編簡。時無蘇司業。何處見酒醜。新涼枕簟瑩。付睡與雙眼。念我南山苗。經年廢鋤鏟。
文園得武皇。引疾常避事。佳哉意殊深。遺迹邈不嗣。揚公漫投閣。不禁問奇字。致身毀譽外。乃得免疑似。
呦呦中林鹿。那得伏鞍銜。愧我蕨薇姿。塵埃蔽朝衫。山人不歸山。頗被猿鶴讒。欲追甫白遊。千古感至誠。
昔有獨醒士。絕口避醪醑。折楊得衆笑。無地至秦青。周詩念忠嘉。所貴食野苽。良時不可再。佳人難合并。

喜吉老甥見過

西風吹藜藿。秋色滿環堵。悲蟲語窗月。陰蕊開夕露。門閉賓客少。鳥雀任散聚。楊甥時過我。論詩朝達暮。
新茶磨細雪。甘井漱清乳。恩恩貧家飯。藜藿不滿俎。頗言行有日。征煌下洛渚。喜汝將鳳歸。驚余髮加素。

老慵愁應接。兒女較口語。樂逢親骨肉。情話到爾汝。先君外孫子。惟爾冠俛俛。平生女類兄。宜爾有風矩。長安木葉落。雨送萬家暑。涼風當沽酒。爲我醉起舞。

劉伯壽秘校

將軍卷金甲。獨臥嵩山阿。千金買峨眉。晝夜飲且歌。時平武庫鎖。賂買戎狄和。不復用英雄。惜哉雙鬢皤。延我寒夜歡。清尊不辭多。壯氣老未已。醉來鬢屢摩。充國年七十。立功未蹉跎。我欲勸公起。拂塵揮舊戈。公言一世中。歡樂能幾何。安用身外名。功高竟消磨。家住太室陽。開門對嵯峨。嘉肴薦尊俎。有酒如江河。度曲得新聲。詞成自吟哦。樂此常不足。尙安知其他。我愕不知答。高賢固殊科。馬援喜功名。旅死遭讖訶。陶潛雖放情。但爲碩人薤。公於二者閒。安處行逶迤。寒廳有脩竹。野泉漲微波。不厭徒馭勤。高車幸來過。

送梅子明通判餘杭

東寒山水窟。錢塘吳越都。吾人神仙後。厭直承明廬。一舸去莫挽。落帆風月湖。踟躕青衿子。能誦先生書。借問太守誰。子雲蜀名儒。家有王陽金。清商奏簫竽。相逢不妨飲。坐嘯治有餘。遙知子還日。未厭浙江魚。

送呂安禮

呂子有奇氣。少年事詩書。不肯衣逢掖。而隨市井儒。白紵霜雪袍。朱纓貫金鈿。大醉必走馬。長呼挽雕弧。興罷有餘歡。清歌倚簫竽。春風動狂思。夜席擁妖姝。羣兒傍笑之。謂子脫檢拘。而我獨知子。壯茲真丈夫。屑屑五斗米。其重無錙銖。何爲愛瑣屑。妄自苦其軀。子亦愛我拙。相逢每躊躇。論詩夜齋靜。秀氣出瑤瑤。

遠官無與權。見君心獨娛。如何忽告別。決去如驚鳧。矯矯黃鵠姿。枳棘非所居。清明擇士日。子豈久泥塗。送別動苦懷。乖離感羈孤。搔首歲暮天。詩成悲有餘。

呂尉醉中索詩爲別

吾友呂子者。其人藝且文。何侯綠沉鎗。顏皋弓六鈞。勿謂豪少年。詩書精討論。文詞踵騷雅。豈但驚庸人。羣兒事膏沐。眩粥倚市門。汲汲恐不售。惟憂貨非珍。子獨抱奇璞。九襲包衣巾。塵口自蒙垢。但畏人知聞。區區事邊幅。碌碌隨俗塵。顧我未免此。深慙非子倫。離別可奈何。高歌倒清尊。願子重輝光。去去翔青雲。

送陳器之

投身落窮谷。黔黔類囚拘。情忘侶木石。機謝友禽魚。粲粲陳夫子。文章德行俱。雖云相知晚。既合乃不渝。我官洛水濱。君寄鹿山隅。孰謂百里遙。滿案堆君書。詩壇兩不懼。日夕鬪戈矛。我贈白玉璧。子還明月珠。今春子遇我。爲我駐驪駒。高懷坐披豁。一飲倒雙壺。聯騎失洛橋。據鞍遞歌呼。劇談燼飲燭。痛飲銷炎爐。首夏餘春妍。子還自西都。連朝守杯勺。芍藥正芬剪。插花烏帽傾。醉倒傍人扶。已別尙反顧。將歸重躊躇。官期子當滿。念別久鬱紆。况乃西郊道。怱怱遇行車。一酌不暇勸。矧欲盡子娛。亦知微誠薄。所惜遠區區。親友義不小。况乃知心歟。忽忽流水濱。尙將執子祛。願子保多福。六翮縱南圖。永此金石交。皦皦堅終初。

別外甥楊克一

彈琴不須絃。意在宮徵外。濁醪分美惡。于道猶薺芥。平生分別盡。獨此有涇渭。坐令劉石徒。笑我猶嗜味。

石常以油爲酒。秋風三十里。碧甌兼紫蟹。參軍呼可應。肯使空樽對。

感遇二十五首

幽居念世務。頗復窺造物。通爲一憤憤。愚智更出沒。漏天呀不補。淫雨方蕩滌。豈獨無良苗。稂莠亦飄忽。惟餘尊中物。三酌便兀兀。此事頗有憑。時從散幽鬱。毀竹伐梧桐。意欲困鳳凰。彼雖無食息。逸氣自高翔。鳳何求于人。人自欲鳴岡。麾之亦安有。庾子鵝在堂。昂昂青雲士。忍飢而擇糧。使果腹是求。何憂無五漿。士生有輕重。初非他人爲。視身真千鈞。所歷無不摧。羣偷讓弊漢。喘走恐後時。隆中賢少年。長嘯弄鋤犁。白頭左將軍。歛衽喜得時。狼石挈紫髯。老瞞受鞭笞。艱難永安詔。委國忘其兒。心知龍鸞人。不顧鴟鴞資。使無三顧重。一飽起相疑。

世無英霸器。俚叟誦詩書。不能靜邱民。安用稱唐虞。堂堂贊皇公。龍變誰可拘。邂逅逢可人。奮身爲謀謨。草書救深州。元翼終就屠。誰能叱邱吏。姦將立改圖。裴度書遣王庭湊不能出牛元翼李德裕語范陽邸更張仲武不敢納亡命。才謀相去可知。世必謂裴勝李。過矣。天方去大和。拔公去其都。十年奇才論。獨智

羞羣愚。文宗將圖闈寺。先出德裕。德裕有奇才。論訓注之敗。

秋房燈火靜。客睡亦復安。弭彊力汲汲。涉廣心漫漫。白露下百草。心知歲將闌。彼微者啼鳩。職使仇蕙蘭。吾非蒿目人。初不與世患。淫雨作橫流。執蠶挹之乾。我師青牛書。不爭忌處先。既自守吾寶。在辱亦何慙。

羣動同大塊。冥冥含至精。乾坤職覆載。日月互昏明。蚊蟲共一器。擾擾一時爭。推移付大化。終古一空名。大冬積嚴殺。布令兆微霜。淒淒中園木。華黍歛摧藏。豈無孤芳者。佳菊獨煌煌。後彫雖爾德。曷補蕙蘭傷。炎劉運欲圯。蠹孽依根生。姦臣助斲喪。主意不得行。云誰知巢穴。請劍有朱卿。傷哉滔天禍。成此直士名。唐皇欲喪亂。豺虎依山邱。君王信李訓。玉殿行戈矛。繫狗不係首。遭噬血橫流。堂堂贊皇公。委棄不與謀。腹心主包藏。爪齒以自衛。折衝須豪英。靖國用君子。遐哉三五朝。此道無不備。晏嬰才媿管。齊景不霸世。商子德慚奚。秦彊仍早圯。

風霜凜已高。歲月逝云邁。蕭條陋巷士。藜藿守耿介。欲吐胸中語。旁人笑言大。漆室非近憂。宜遭鄰里怪。登高望海縣。秋日麗玉京。喧闐車馬音。風震入青冥。大明屬昌運。戴白不知兵。華衣美酒食。婦織子孫耕。生無係虜憂。乃覺患禍輕。請看五季世。戰地猶榛荆。

西京全盛日。宮闕上參天。建章千萬戶。白晝下神仙。金瓊麗雲日。棋角壓山川。一朝喪亂至。兩觀入戈鋌。漸臺旣已平。長門隨風烟。物大變亦巨。安榮竟徂遷。毋怪秦漢君。甘心惑神仙。

穰侯拉關中。頗畏諸侯客。搜車計已遲。終困范公策。庸夫吝富貴。百計私自惜。勢移禍敗至。智巧竟何益。至公覽英俊。苴補乃無隙。請看桑林餓。亦脫趙子厄。

覺隙不在大。巫臣圖夏姬。百端終困楚。吳子會黃池。怨有大于此。居高易逢危。何言戒困獸。無易簣中尸。林居屏百患。覃思觀幽遐。炎黃已蕪沒。末路多疵瑕。私智互馳騁。短長迭矜夸。更相爲禍福。勝負時紛拏。

超然赤松子。高笑在雲霞。

周王仗黃鉞。自謂將天威。孤竹兩君子。采薇旁笑之。豈徒驚世俗。趨死乃如歸。周衰楚蒙吏。快辯多文詞。高言毀二子。至與盜跖齊。夷齊固齊聖。于道豈無知。輕身立世教。爭奪尙如斯。

江湖有潛鱗。頗厭沮澤陋。竭來游滄溟。矯首觀宇宙。是時三神山。忽隕巨鼇首。奔波走仙聖。龍蜃紛格鬪。重淵沸日月。萬類錯昏晝。掉尾歸去來。蓮巢以爲友。

衆聖演世教。金仙獨圓成。徒緣異形範。乃復遭譏評。幽居覽物化。且復究吾形。捐書守寂寞。萬化歸無生。治疾弭靈藥。爽然疾有瘳。因茲涉方書。仙聖或可求。豈疾乃可治。而生不可留。吾將飛五金。息駕于蓬邱。懷王棄屈子。憔悴楚江涓。終然葬魚腹。終古耀文詞。千年洛陽客。作賦不無譏。謂當棄之去。覽德乃下之。君臣本大倫。當以恩義持。如皆輕合散。是與塗人夷。靈均豈願沉。深意實在茲。傳懷終泣死。何亦拳拳爲。微陰兆九地。萬木方滋榮。微霜初可履。回首陽泉冰。秦王按劍日。豐沛赤精生。光輝能幾時。日中月已升。達人知其然。居世忘驕矜。彼哉夸毗子。志氣易滿盈。

處世三不遇。放歌歸去來。林臥觀太初。悠悠付一杯。扶搖震雲海。三山安在哉。金丹或可學。他日出塵埃。蒼鷹初化鳩。未忍望擊搏。照水或見形。乃見悔其昨。麗戎有奇女。遭虜常涕洟。改服登晉宮。更恨來石遲。變化驅念慮。丈夫或有之。貧賤矜懷寶。富貴乃無奇。纒絲未緣魚。有絲生網心。弦木以爲弧。鳥獸不安林。大鈞本無事。物類亦愔愔。誰令一機駭。萬變起相尋。

焚木豈入火。棄沙非外金。如何巧詐子。尙欲峻而深。

晚春獨酌有感

春晏巖谷秀。喬木環我居。引此西澗泉。澗澗漱我除。危橋跨方池。脩竹萬有餘。人閒午陰靜。鳥下驚游魚。清風掃我堂。吏案無文書。手携金仙經。諷誦自卷舒。身閑去道近。地僻與世疎。何須緩巧頰。搖曳王門裾。誰謂我無友。蕭然山谷閒。脩竹乃佳客。清風如妙言。擷彼林閒筍。致酒方池邊。惟時春服成。花葉猶斑斑。月出我已醉。扶歸不知眠。洒然中夜醒。起聽西澗泉。世累乍去念。放歌心浩然。功名付長嘯。持用樂目前。

糶官粟有感

持錢糶官粟。日夕擁公門。官價雖不高。官倉常若貧。兼并閉困廩。一粒不肯分。伺待官粟空。騰價邀吾民。坐視既不可。禁之益紛紜。擾擾田畝中。果腹才幾人。我欲究其源。宏闊未易陳。哀哉天地閒。生民常苦辛。

將離柯山十月二十七日

去此定有期。逝將泛扁舟。千里須聚糧。尙復少遲留。雖有隸囚籍。聊喜脫遐陬。問我行何之。岱宗古東州。念我所居堂。蓬茅委荒丘。西窗兩芭蕉。誰見春萌抽。園梅粲已發。明掩懶重游。今晨一長歎。離思浩難收。

視盜之南山

窮冬策羸馬。祇役走南山。原野勢忽盡。並溪屢回澗。列石如牛羊。流泉鳴佩環。兩峽忽壁立。仰失團圓天。淺澗凍欲絕。層冰冽我泉。躋攀越前嶺。危石萬丈懸。衣薄近翠壁。雲低上層顛。谷深日無輝。地絕風更寒。

百里不逢人。我徒互悲歎。但見女兒峯。萬尋戈劍攢。淋漓鎖冰雪。冷射狐裘穿。日暮投主人。茅茨起孤烟。燃薪不計束。未解手足拳。主人前致辭。問官來苦艱。我答豈得已。王事不可閑。饋我脫粟飯。殷勤爲加餐。山家無酒肉。麤糲味亦甘。月出萬嶺光。夜歸霜滿鞍。迴視所歷途。猿鳥應愁顏。暗想酸兩股。夜眠驚夢魂。人生亦可貴。何事戀微官。

冬日自福昌之澗池。

羣岡洛陽西。勢若海浪翻。連嶺起我左。層阜當我前。采如獸騰突。繚若蛇蜿蜒。外高陟縹緲。卻下逼重淵。老崖忽中斷。俯視毛骨寒。百丈未見底。立土如巖巒。登高望四垠。目斷無平川。崩騰萬馬羣。出沒相後先。雖有貔虎軍。顧步安得前。我觀絕塞處。塊土萬雉堅。峻灑自古險。秦人有重關。信哉天作固。扃鍵誰敢干。時平戰伐息。地闢村落閑。堆阜何茫茫。耕桑莽相連。平生喜壯觀。弔古重悲歎。山川只自爾。與廢何多端。宿峻極下院。

天寒蒼山高。野寺在山麓。長林繫我馬。古屋留客宿。空巖陰風豪。達旦號古木。夢爲神仙遊。境界脫塵俗。平明出戶望。曉日在巖腹。冰霜刮昏霾。萬丈攢翠玉。山行日已久。常苦見未足。猶同賢者處。愈久愈可欲。傳聞峻極嶺。千里如在目。愧爾巖上僧。窮年玩幽獨。

下鰲嶺

陰風吹我衣。左右入石壁。石色寒更青。蕭蕭響枯櫪。深行方慘淡。路盡兩崖關。羣山岔然來。千里平若席。

茲惟東周壤。氣象雄萬國。山河拱別都。自古帝皇宅。輻輳天設險。坐制萬夫力。周公卜遷鼎。彼肯事無益。天寒僮僕愁。歲晚霜霰逼。緬思垂堂戒。攬轡三歎息。

初離淮陰聞汜水已下呈七兄

朝離淮陰市。春水滿川平。依依道邊人。送我亦有情。千里積雪消。布穀催春耕。人家遠不見。柳色烟中明。輕舟鳴榔子。野靜遙相應。連網收潑刺。嘉魚飽南烹。平生晤誤歡。促膝聯弟兄。相逢古難得。白髮老易生。檣烏飛更北。汴柳綠相迎。從今淮山夢。卻在鳳凰城。

次韻七兄龜山道中

連山赴靈龜。石脚疊如積。巍峨黃金剝。負此鼈背力。孤舟繫東風。淮雨暗春色。朝來一悵望。別此巖下石。危檣鼓帆腹。輕櫓跨浪脊。林分岸忽盡。鳥去天未極。遠游快新矚。勝事旋陳迹。悵此故里遠。塵駕何時息。

龜山水陸院

院靜步柏影。庭虛聞塔鈴。連龕香慘淡。古榜金青熒。山背負華殿。淮身朝廣庭。旛花龍護法。梁棟神扶傾。緬懷開山人。天眼照廢興。一菴檀施集。百堵神鬼驚。支祁萬古穴。石老深潭清。坐令金仙力。鎮此水府靈。我來望春野。高閣近青冥。白髮老比丘。俯僂因逢迎。豈無世外人。燕坐守無名。重堂百僧會。合有菩薩行。平生一鉢意。長歲百慮更。狂逃不知返。勝地念浮生。

曲河驛初見嵩少

我行日益深。所遇日益好。森然過絕壁。慘淡石色老。層峰乍崩奔。峻峽忽開導。清溪瀉兩閒。淺瀨淨水鳥。縈紆石路窄。構架野橋小。娟娟翠篠寒。時見木合抱。危亭偶平曠。是日見嵩少。峩峩重雲外。傲睨插蒼昊。坐令羣山勢。凌轢困籍蹈。平生忽俗事。丘壑情所好。無謀苟自給。薄官廢幽討。豈無幽棲士。願我林下笑。會當採芝去。富貴曷足道。

秋懷十首

西風吹前林。壯士中夜興。感此歲月晚。白髮來無情。少年讀詩書。意與屈賈爭。口談霸王略。銳氣虹霓橫。天衢白日開。致主皎丹誠。豈懷富貴念。但愧稷契朋。栖遲客淮海。憂患相纏嬰。憔悴消壯氣。飢寒費經營。心期與外物。易失常難并。蕭條爲斗粟。貧賤洛陽城。我生亦有命。榮辱復何驚。但驚歲律逾。慷慨懷平生。呼兒致濁酒。長嘯視青冥。醉爲梁父吟。吟終誰爲聽。

又

飄風激浮雲。飛雨來若注。絺衣逼新涼。感此歲云暮。高堂有華簾。坐覺顏色故。人情隨炎涼。興廢一何屢。鮮□中庭菊。華葉日敷布。可憐搖落中。爾獨傲霜露。官閑隨□念。歲晚無歡趣。惟與青山期。晴明躡芒屨。

又

夜靜四聽絕。蟋蟀鳴我堂。知時爾雖早。嘖嘖竟何傷。西風肅萬木。百物皆摧藏。爾豈不自得。悲鳴愬中腸。寒衣已在袖。紈扇委空牀。幽詩嗟婦子。入處謹風霜。而我獨何成。遠遊悲異鄉。出處兩無策。感時空慨慷。

又

歲暮無所爲。官門聊飲酒。家貧乏肴果。擷蔬不盈手。要歸一醉爾。甯復計薄厚。頽然几案閒。樽散忘宇宙。古來痛飲人。可是耽醇酎。由來困寂寞。聊此娛昏晝。紛紛眼前物。泯泯胸中垢。當其暫忘去。快若免介冑。蕭蕭風入簷。皎皎月當牖。歌罷興已闌。感歎還搔首。

又

蟲鳴一何悲。竟夕不能已。缺月能幾何。光輝還暫爾。青燈照牀帷。解帶偃宵寐。勞勞隨朝日。既夕聊此憩。是非競賢否。榮辱爭賤貴。紛然無時停。膏火互煎沸。區區竟何有。俯仰終一世。癡兒自驕玩。達者已高逝。無營謝巧械。咋舌笑愚嗜。猶須多貯酒。遲暮聊卒歲。

又

西風掃黃葉。零落委我前。閉門無來客。空牀過午眠。牀頭亦何有。狼籍古人編。琳琅巧言語。照輝後世傳。餘榮更何恃。朽骨但茫然。悲哉事無益。辛苦勞生前。嗟我方病此。詩書費雕鐫。知愚不自己。既痼何由痊。霜梧夜械械。寒菊朝娟娟。胡爲不飲酒。戚戚愁吾年。

又

悠悠春與秋。泯泯朝復夜。濟時無遠圖。謀食阻高謝。茫茫兩不可。默默私自咤。疎絃無悅音。失路有迷駕。孟軻竟迂闊。樊子欲耕稼。古人不吾待。子子欲誰舍。詩書頗完緝。官事幸休暇。聊從心所樂。此外曷足藉。

又

原野日遼闊。南山疎亭亭。夏雲歛氛翳。秋木呈疎明。幽居苦不樂。展步乘朝晴。嗟我無羽翼。何由躡嵯嶸。神仙雖誕漫。可以忘俗情。乘桴古亦有。况復凌滄溟。浮生既有限。散誕煩冠纓。黃精若可採。高揖吾其行。

又

秋風從西來。百草隨委棄。如何中庭花。粲粲濯朝霽。雖懷遲暮感。獨秀亦云異。炎涼各一時。豈必桃李貴。遲功有暮社。銳進或先退。由來一氣耳。瑣屑何足計。

又

吏散門寂寂。蟲鳴夜沉沉。素壁上明月。涼風搖樹陰。悲歌忽不愜。感歎涕盈衿。寫此牢落懷。默坐彈鳴琴。俗耳不好古。古人已非今。悲哉曠四海。子子無知音。

上元家飲值文安君誕辰

新正值家節。時雨霽良宵。林垌敞梵刹。香烟繚白毫。士女傾都出。夾路輪蹄驕。誰能衡茅下。寂寞守無聊。載御芳蘭饌。無辭玉色醪。况值私庭慶。祝壽比蟠桃。

初冬偶成

清商忽已謝。環堵緬清冬。今晨起何早。肅氣淒房櫳。繁霜凍欲結。霧霧迷長空。理畦曉蔬盡。收果高林空。六年淮陽客。歲歲風景同。吁嗟吾老矣。撫事思無窮。

寄集節二首

陳侯氣飄飄。誰敢易挹酌。俊如搏風鷹。清如唳霜鶴。高懷洛俗事。見者初駭愕。須臾發其有。珠玉隨洒落。浩然謝畦畛。誰不愛而樂。論交嗟我晚。玉手未暖握。別來星一周。庭竹再飄籜。洛陽誰知子。恐未免寂寞。嶢嶢胸中氣。誰與發其鑰。知心古所少。獻厚報或薄。興懷每念此。中夜情抱惡。雖然千金壁。豈得常在璞。山城一尊酒。子去誰酬酢。高歌遣我思。長嘯觀廖廓。

北風號空庭。山雪鳴急霰。是時我與子。傾蓋初相見。相逢兩恨晚。語罷喜復歎。明燈照紅爐。杯酌方爛漫。劉公摩霜鬢。氣若初捷戰。喜我兩人交。深杯手持勸。縱橫恣談笑。一醉便侵旦。想子病酒容。蓬頭不能飯。那知會日少。告別不容戀。出門送子歸。慘若失侶雁。終朝或不語。妻子怪相問。別來三得書。日月去如箭。栗何在何處。山川浩千萬。吾將理南棹。遂我江湖願。兩如隨風雲。那復計聚散。遲君秣驪駒。別我過窮縣。以上宛邱集。

柯山集拾遺卷二

五言古詩

食杞

江皋春氣足。佳杞蕃新苗。老枿飽霜露。餘滋發柯條。青青被修口。若綠空壕。僮歸必盈筐。一杯勸爾勞。神農不吾期。夸譽何忉忉。堅筋及奔馬。瑩目察秋毫。餘功補陽幹。清利勝薑椒。老臞天隨翁。空斧無脂膏。飯成資爾薦。長對顏家瓢。

在告家居

朝日入寒屋。春風已復來。老子朝睡足。悠然有好懷。冬溫抱微疾。亦不禁酒盃。悠悠三酌後。徑使牢愁開。惱我以貧賤。我心如死灰。誘我以富貴。我視如塵埃。以此行世間。何往願不諧。呼奴具鱸脯。蔬果粗安排。餅中幸未燥。不醉何歸哉。

臘月十八日蚤苦寒與家嬾飲

寒夜不可旦。老鷄鳴苦遲。晨興出戶視。風折山樹枝。暑愛堂東梅。冽寒亦弄姿。夜來月中影。窺我讀書帷。中庭石井欄。晨汲氣如炊。今日復何事。環佩聯冰澌。藝器有芳醇。庖舍具鮮肥。地爐熾新炭。三酌對山妻。

余謫居齊安寓郡東佛舍而制不得逾歲今冬遂移居因遣程結料理新居作詩示之

孟冬寒氣至。北風羣木衰。微霖墮簷瓦。老客臥先知。二年蕭寺客。巾履忽復移。誰令簡書畏。易此鷓鴣枝。冥冥造化中。毫釐陰有司。念此雖細事。亦非人所爲。東窗頗明爽。洒掃吾遨嬉。濁酒爲余辦。勿使歎空卮。自乾明移居柯山何氏第令程結先葺所居

吾居最易足。容膝便有餘。平生一畝宮。游宦乖所圖。謫官求便文。僦舍柯山隅。灑掃勤汝力。真成野人居。棲鴻媚夜渚。待旦志在塗。栖遲聊復爾。本不計憂娛。惟此東窗下。可以陳圖書。三酌便陶然。何者爲吾廬。十月十二日夜務宿寄內

夜寒欺老人。展轉睡不足。長年怕爲客。况此空齋宿。噫噫度雲雁。瑟瑟受霜竹。凍骸冷如植。未覺重衾燠。天明起盥櫛。淡日初照屋。寄聲家具酒。買魚烹雁鶩。

遷居羅漢潘邠老昆仲比以火驚相見殊闊作詩調之

畢方逐未去。里巷時狂走。念君簞瓢外。顏室空無有。誤憂黎元謾。烜赫驚戶牖。我雖厭遷次。寒突黔已久。平生昧奇字。安得君載酒。

東園

浮雲蔽亭午。白日成蕭森。餘涼入坐隅。蕭洒散煩襟。孟夏愛吾屋。秀木成佳陰。衆果頗已成。永日鳴山禽。杖履時亦到。逍遙忘滯淫。舉頭天雨霽。落日低遙岑。

荒城繁草木。落日下牛羊。巍亭俯蔬圃。秋物半青黃。敢愛雄雞冠。殷鮮如激昂。黃葵貴且麗。薄夜掩其房。低篁掩蟋蟀。枯羣巢螳螂。落落中畦棗。垂實半老蒼。深行亂飛蝶。時亦掇芳香。況復攜婦子。笑言何樂康。歸溪踏新月。到家燈燭光。田園興偶動。疎懶意何長。

步下四望亭至東坡柳逕訪邠老不遇

北下四望嶺。兩山中曠平。縈紆蟠逕術。迤靡分溝塍。林間樵汲路。壙外牛羊鳴。落景急晚春。淺泥聞耦耕。餘紅猶落落。高綠或亭亭。柳間見衡門。欵屋尙崢嶸。主人掩關去。春蕪空復青。論文挈兒曹。得句懷友生。安得輞川翁。畫此十幅屏。

上巳日洛岸獨遊寄陳永甯

風零感賢游。嘉節偶乘興。人稀好鳥語。麥秀春野靜。澄波漾清洛。游子渡明鏡。南山夜來雨。雲日淡相應。解鞍憩高柳。覽物動新詠。優游徒侶喜。豐熟蔬果盛。官閑省文檄。俗古少喧競。乘閑輒獨游。茲焉樂吾性。

渡洛游三鄉書所見

重雲蔽南山。遠見山雨白。我行山之北。便與雲雨隔。西風來如奔。零亂雲物拆。驅除信果決。霧霈絕餘滴。收雷如歸師。蹄轍度南磧。羣峰湧地出。掀蕩無留碧。暮投三鄉寺。落日在東壁。鐘鳴高閣晚。野迥見歸翼。還家晚川靜。秋月未生魄。聊資覽物態。應用慰行役。

游白馬寺

秋林轉層崖。步踏落葉響。森森夾路竹。轟轟羽林仗。精廬隱深塢。門啓臺殿敞。纍纍霜果懸。落落寒木壯。房深燈火煖。縱飲頗酣暢。山寒夜已深。嶺白月微上。天明寺南去。幽路隘而昉。林分逕忽斷。淺見闊逾丈。崩奔被澗石。大小非一狀。丸丸列困廩。落落排甕盎。鳴泉走石罅。聯絡弄清漲。喧頽競飛湫。派瀉或平漾。羣行命朋儔。困息植吾杖。松松見奇鼠。石蟹侑朝餉。深行耳目靜。擠險誰復讓。寒聯老木陰。暖值丹崖曠。秋暉墮平野。暮鳥啼青嶂。徜徉未知返。欲去意先愴。膏梁與薇蕨。美惡隨所尙。當其兩自得。厭滿絕餘望。乃知山林樂。豈爲隱者妄。況吾不事事。枯槁理則當。遑遑施仁義。此固聖賢量。我自沮溺徒。疎頑安可強。

獨遊崇化寺題觀音院

默默苦不展。駕言陟崇崗。人遠塵壅息。高門開寶坊。華簷敞虛殿。喬木護修廊。閒庭引幽步。偃息得茲堂。惟時炎火衰。清秋朝暮涼。窗虛竹色靜。風遠松聲長。遙山露雲表。遠水連天光。獨遊不自得。遐眺有餘傷。留滯感華歲。登臨思故鄉。言歸日已夕。月出林蒼蒼。

宿鳳翅山懸泉寺

秋山晚景涼。幽路轉石壁。稍知步武峻。漸與鷄犬隔。層崖恃我西。懸瀑垂百尺。崩騰擣重泓。晝夜碎珪璧。天寒行已深。嶺轉客轉息。最愛下山泉。潺潺馬蹄側。重門敞幽寺。臺殿忽開闢。野僧三四人。披衣出迎客。陰陰脩竹靜。下有神龍宅。泓澄一畝泉。黯黯萬古色。悠然改瞻視。異物如不隔。蕭蕭毛髮疎。佇立動神魄。

雲低秋天陰。木落山日夕。房寒燈火青。夜久人語寂。通宵淡無夢。起望曉天白。山川接周韓。清洛去不極。我無軒冕意。野性自夙昔。塵埃阻幽好。奔走愧謀食。儉閑到丘壑。便欲老泉石。君有在籠鶴。豈願潛六翮。將歸且復止。既去緩吾策。寄語山中人。行當蠟雙屐。

病瘵登疊嶂樓

沉疴幸蕭散。登覽慰無聊。江南春尙早。餘雪冒山椒。野梅臨風謝。溪澗映日消。晴林鳥聲樂。幽墅水文搖。新年人意樂。初霽物華饒。共理慙良牧。無政載風謠。

登雙溪閣

清溪浮天光。北驚而西折。羣山合沓來。斷作青玉玦。中圍萬家邑。簫鼓樂芳節。仲春卉木麗。紅綠晚明滅。重樓壓城角。高眺俯木末。川雲斷還續。谷鳥鳴復歇。興闌未能返。留酌待芳月。

淮陽

淮陽古帝墟。鄙夫少所遊。最愛城西路。槐榆拱高秋。城下古濠水。□澄泓不流。嗟哉始封君。千古留一邱。西風隴新兔。魚鼈亦易求。穀穗如垂珠。松林風颼颼。異鄉仍謫官。一步九回頭。何時守一廛。白首自徂縶。

新開北原

山深草木多。春夏廢翦剔。北原有高溪。經歲不躡屐。陰根走重險。飛蔓密如織。交柯不容鳥。老栢頑若石。由茲廢登眺。幽致莽蕭瑟。杖藜每獨往。駐立爲歎息。窮秋九月衰。霜過萬葉赤。北風始驅除。蒙翳遭搏擊。

乘時集吾徒。斤斧必謹飭。攀緣窮翦伐。上下恣搜剔。霜芒落勁節。巨剗剖堅植。蛟龍脫鱗鬣。犀兕遺骨革。薪蒸不足道。椽棟固委積。紛紜一日勞。既暮岩藪闢。寒篁露幽翠。佳木呈秀色。高臺忽平敞。快步失荆棘。巉巖女兒峰。次第見晴碧。遙村暮烟合。烏鳥寒寂歷。縱橫目前景。指顧歸咫尺。茲焉遂忘返。漸可攜尊席。人間有能事。功效在勤力。惡深當痛治。穢盡善斯得。經年滯窮谷。庶以娛朝夕。題詩寄初終。撫事心有激。春遊昌谷訪李長吉故居

連山忽中開。研若做雙戶。清泉瀉中間。行子並溪去。蒼崖左右壁。田壠亦碁布。渠流漲春漪。鳴澗轉芳嶼。鷄豚見茅屋。負檐隱微路。竹塢藹青葱。花岩被紅素。仲春雨新斂。晴日破氛霧。南山當其門。列嶂儼環護。深行不知厭。捨馬時獨步。欣然耳目愜。遂我麋鹿趣。朝隨浮雲來。歸轡月中度。惆悵錦囊生。遺居無復處。寄題何戡秀才琬琰堂

幽人築淇澳。不與世相聞。獨攜千卷書。過於骨肉親。辛苦作室堂。插架如魚鱗。時時體不住。一遇千載人。山川兵火後。墟廟金石存。消磨餘紙墨。幻滅去無痕。功名但如此。知子道可尊。不遺世一毫。以全與其身。包醜傳黛膏。百態售笑顰。誰能雙蛾眉。閉戶自貴珍。鄙人有夙尙。願與幽侶敦。他年抱健憤。聽嘯入蘇門。讀管子

夷吾相桓公。豈復偶際會。觀其平生心。身已有所委。天方困生民。弔伐實在已。求居寓所欲。糾與白等耳。堂堂東海邦。內政謹疆理。南荆北達燕。玉幣走千里。仲尼免左衽。自以身受賜。孟軻聖之偶。非薄良有謂。

彼狂後世儒。詆毀恣輕議。嗟哉不量分。詎解聖賢意。區區彼商鞅。操術良非是。爲法昧所從。以身受其弊。

讀杜集

風雅不復興。後來誰可數。陵遲數百歲。天地實生甫。假之虹與霓。照耀蟠肺腑。奪其富貴樂。激使事言語。遂令困飢寒。食糲衣掛縷。幽憂勇憤怒。字字倒牛虎。嘲詞破萬家。摧拉誰得禦。又如滔天水。決洩得神禹。他人守一巧。爲豆不能簠。君獨備飛奔。捷蹄兼駿羽。飄萍竟終老。到死尙爲旅。高才遭委棄。誰不怨且怒。君乎獨此忘。所惜唐遺緒。悲嗟痛禍亂。欲取彝倫叙。天資自忠義。豈媚後人覩。艱難得一職。言事竟齟齬。此心耿可見。誰肯浪自苦。鄙哉淺丈夫。夸已訕其主。文章不知道。安得擅今古。光焰萬丈長。猶能伏韓愈。

石曼卿三佛名大字

石公神僊狂。脫落隱詩酒。餘情到翰墨。落筆聞宇宙。崢嶸龜山殿。風雨梁棟舊。煌煌三佛榜。鐵柱貫金紐。開張宮室正。渾實山嶽厚。井水駭龍跽。蝟封觀驥驟。欲知兮毫初。一醕盡數斗。墨池氈作筆。神運不知手。從容解牛際。蕭散善刀後。古來精絕藝。所貴神氣守。嗚呼過水側。爽氣一培塿。微工付浩劫。念此終銷朽。乾坤一大幻。妄計金石壽。惟有龕中人。吾生茲稽首。

臥病讀韋蘇州詩呈无咎

閑官無吏課。未午省中歸。端居屬微疾。偃臥度秋輝。書帙紛几席。減穀亦清羸。庭花敗風雨。晚蝶弄餘姿。懷公天津語。夢起江湖思。高秋挾槌櫓。一與水神嬉。上去觸檣鬪。奮飛有紮維。令人慙髀肉。消盡定何爲。

喜寶積智道人惠書偈

南山老禪翁。白淨如水月。我初獲親近。解此癡腦結。十年歸故里。父老半存滅。逢師百如舊。才若旦夜別。故知靜能久。豈有火中鐵。致身煩熱外。與世作冰雪。窮秋長安巷。客子送書札。龍蛙不同趣。掬海救其渴。平生笑謀食。中路願頗奪。猶如伏轅鹿。野性終跳踔。觸塗惟欲睡。過眼時一噉。摩尼本無瑕。塵垢終冀豁。

讀太白感興擬作二首

瑤姬上帝子。天日與晶光。萬古巫山中。玉顏照秋江。世界一培塿。誰知楚襄王。宋生底蟲蛆。妄以己意量。我無世上心。乃遊不死鄉。與爾等愛惡。朽枯終一藏。陳王本無賴。少與美人期。蛾眉作穢血。盡鬼尙何知。乃復結綢繆。佇車心傷悲。幻滅猶欲取。哀哉一癡兒。千年化異物。雙作鴛鴦飛。終然隨大化。飄蕩今何之。

讀唐書二首

隋文方混一。自謂垂無疆。安知房之喬。拱立待其亡。哲人妙觀世。俗慮固不長。我知蒲柳衰。甯待遘風霜。奇姿終英發。起驂龍鳳翔。巍巍貞觀續。千載配虞唐。二張挾嬖寵。聲勢各滔天。蛇鼠依城社。自謂終千年。天道惡滿盈。五龍忽騰騫。斷頭誰救汝。豨豚尸道邊。擊狗不擊首。反噬理必然。智勇忽迷方。脫匣授龍泉。區區薛季昶。先事僅能言。留禍敗臨淄。敗謀豈非天。

睡起效章蘇州

睡足起無事。開扇步中園。中園復何有。花草藹已繁。飛紅被行路。山鳥時一喧。時雨副耕稼。農事起郊原。

仰欣天時好。俯驚歲月奔。自憐栖遲者。守寂沒亡言。

飲酒擬柳子厚

澤國多水氣。日西春尙寒。窮居無樂事。且復開清樽。一酌召和氣。三觴失愁顏。百憂如崩雲。天地爲我寬。采采中田杞。愈食仍甘澹。登盤自有味。何必盛炮燔。

何斯舉惠酒

孟夏飲燒酒。窮居莫致之。扣門聞好語。出應自披衣。雙榼儼在門。使者前致詞。歛衽受嘉貺。敬此旨且時。且喜尊不燥。安得計滄滴。但恐味奇字。令人愧鴟夷。

文周翰邀至王十元園飲

朝衫衝曉塵。歸帽障夕陽。日月馬上過。詩書篋中藏。心疑長安人。一一如我忙。城西有佳友。延我步閑坊。入門見主人。謝客無簪裳。蒲團烏皮几。密室留妙香。門前佳木陰。堂後羅衆芳。飯客炊雕胡。旨酒來上方。盈盈雙鬟女。身小未及牀。執板歌一聲。賓主無留觴。嗽井消午醉。掃花坐晚涼。主翁塵外人。三十辭明光。閉門自灌園。種花見老蒼。有才不試事。歸臥野僧房。知君非徒然。顧我不能量。始知同一國。喧靜自相忘。衆緣結夏帷。老紅駐春粧。何惜君馬蹄。坐令風雨狂。

寺晚

春寒掩古寺。遲日轉修廊。古殿流塵暗。空庭碧草芳。中有搗笳者。非醉亦非狂。謫官滄江上。已換一炎涼。

春來不出門。蔬飯守禪堂。不知門外花。風雨知在亡。與來時展卷。睡足自焚香。清吟嘗冒酒。疎懈味何長。余方止酒。

辛未立春

彩勝耀朝日。歡言立新春。朝陽披宿靄。頗覺天地溫。蔬盤簇細甲。相勸御芳辛。誰云冰霜底。微綠還陳根。我居雙老槐。對聳蒼龍鱗。歲窮益慘淡。何以慰老人。

三更

三更月暈合。定知明日雨。開門已蕭颯。寒氣侵庭宇。東風變淒涼。閉戶思室處。賴茲尊有酒。細酌供燕語。斗杓行指卯。雖寒能幾許。惟應園林好。新霽千花吐。

正月二日探春

青春來幾時。臘雪消未已。蒼茫陳根中。新綠已映趾。高風變冰霜。和氣從此始。青芒綴蒲柳。紅粒粧桃李。融泥發新陽。暖日動生意。經年不窺園。偶此攜婦子。提筐擷野甲。若苦寒蔬美。新年酌尊酒。佳節聊燕喜。優游自有趣。朝市苦多事。閑暇不易求。甯須歎留滯。

端居

舍東日初上。堂南雪已消。鳥聲弄新霽。春風動柳條。學道心未降。端居生寂寥。佳人不可挹。芳物爲無聊。夕扉還自掩。彎月已翹翹。黯黯長安夜。愁思悵迢迢。

又

餘寒羞老木。慘淡氣未平。王國富車馬。士女競新正。風埃息九陌。紈綺艷重城。燈稀夕烟重。斗轉夜寒生。倚檻復何待。依依空復情。

四月之初風雨淒冷如窮秋兀坐不夜堂

東君已成歸。風雨爲之殿。夜來柯山溜。深射交百箭。可憐東園花。收拾無一片。開門不能出。逕滑那得踐。還歸酌卯酒。佐酌有藜苳。重思理貂裘。未月愁紈扇。

又

風雨四月初。正作窮秋寒。朱明方更候。陰沴時相干。陰陽天自便。寒暑無必然。玄冥與祝融。政事誰得專。江鄉累歲飢。一飽望今年。不知誰不仁。探喉奪其飧。柯山窮老人。方暑愁衣單。似聞林笳立。蟲蟲戈戟攢。但知飲美酒。折取共朝盤。

夏夜

一雨洗空曠。肅然天地秋。陰陽有至信。殘暑逝不留。中夜事忽變。西風延蓐收。雲雷西北來。瀾漫布九州。萬生息燄焚。我疾亦已瘳。起哦不待曉。暗步禪堂幽。落月傾屋西。候蟲鳴不休。坐令百感集。歲晏此淹留。

十月七日晨起

山鷄鳴曉晴。寒日在蓬華。老人欣然起。搆火溫小室。室中空無有。掃榻對像佛。還觀舊文字。塵土暗編帙。

一杯徑就醉。四體寒若失。隔窗卽山麓。寒木鳴瑟瑟。江民旱累歲。流冗東就食。蛛蝗食陳蔡。千里無草色。客來談世事。亶亶語千百。客去深閉門。頽然無我責。

衰荷

衰荷有餘姿。秋水清更急。木落天宇寬。庭虛山氣入。寒魚漸受釣。野果晴可拾。幽居無餘營。但與山水習。濟時無良謀。戎陳畏戈鋌。端坐閱歲時。多慚微祿及。

入伏後三日

老火熾而焰。端能流弱金。清秋有微警。西風生薄陰。日中無停暉。俛仰忽已沉。齊絜不足玩。流景逝駸駸。盛衰甯獨行。中具密相尋。蓬茅有佳處。亦足慰人心。

畏暑不出

赫赫三萬里。共煮一鼎湯。蓬茅數椽屋。何處有清涼。惟有攝心坐。憇此真道場。清虛無一物。焚灼不能傷。自我知此趣。兩脚不下堂。人皆笑我拙。我亦笑人狂。

夏至

長養功已極。大運忽云遷。人間漫未知。微陰生九原。殺生忽更柄。寒暑將成年。崔巍千雲樹。安得保芳鮮。幾微物所忽。漸進理必然。肆哉觀化子。默坐付忘言。

庵東窗雨霽月出梅花影見窗上

山頭冷月出。射我幽窗明。屋東有新梅。寒影交疎樞。暗香不可挹。彷彿認繁英。耿耿終無言。依依如有情。恍疑姑射真。仙馭下我庭。姮娥曉西去。滿樹晨霜清。

疎梅二首

疎梅落寒晴。高柳暗春夕。低星上蒼寒。遠鐘韻澄寂。頗私朝市間。更得闌闌僻。且復罷經過。深泥濺馬臆。

又

我貧受寒欺。帖帖爲不出。積雨遮市聲。幽居近芳物。時禽過我柳。清喙動鳴瑟。客去門復扃。低參映林沒。

黃菊

黃菊出荒歲。揚揚顏色好。芙蓉不能霜。敗裂不自保。君子與小人。於此見其操。最憐所種蔬。根葉依畦老。朝晡充盤飧。滋味不枯槁。鷄鳴鄰里靜。老子起常早。呼童速沽酒。無使尊中燥。

次韻錢大尹公庭種菊

人才困齊量。能尺不能咫。誰知錢京兆。獄訟間書史。平明吏擁堂。過午掃階所。風威變姦傲。應若度淮枳。清秋動高興。庭菊粲可喜。栽培豈無情。收拾自棄委。客來擷芳秀。歲晏聊爾耳。新涼一尊酒。九日意在彼。平生經濟手。張趙一泥滓。何必淪落英。離憂對蘭芷。

堂下幽草

烈日三萬里。所至壞金石。嗟哉庭中草。獨不改佳色。日中雖暫萎。晨露發鮮碧。深根通九地。變化有微測。

應知一氣移。不得常炎赫。

詠雙槐

花開水可憐。采色不堅久。譬如玩冰雪。隨執隨去手。可悅則生愛。愛滅惱隨後。美好稱不祥。此語端易究。中庭兩蒼槐。老栢獨晚秀。殘春餘十日。萬葉舒欲覆。森森翠羽蓋。植立分左右。波濤起風夜。幄幕護炎晝。其榮無可悅。衰變亦何咎。欲攀無足玩。欲擷無足嗅。泊兮初無情。淡也故可守。病來捐衆嗜。味道有真觀。寄言兩蒼翁。請與汝此壽。

大榆

高榆百餘年。其大數十圍。修柯遏雲日。老栢干虹霓。嗟爾擁腫材。大匠已見遺。何人失翦伐。養此頑鈍姿。夏葉穴蟲蟻。繁柯蔽涼颺。寒颯烈風怒。號白陵冬曦。鸞鳳不女巢。所藏鴟與鴟。吾甯愛彈射。念爾不□宜。蟠據起牆屋。斧斤諒難施。去惡不慎微。既成安可追。

竹

自吾居山中。默默無與歡。朝晡誰相對。賴此青琅玕。堂東一畝池。遠分西澗泉。蕭蕭一萬竿。結根護池壩。婉婉翠鳳凰。舞風照清澗。微颺自天來。新佩鳴已喧。王子骨已朽。後來豈有賢。諒非聾與盲。敢慢回與窳。灌溉養春苗。芟除去其繁。終日淡相對。俗車無至門。

石竹

眞竹乃不華。爾獨艷暮春。何妨兒女眼。謂爾勝霜筠。世無王子猷。豈有知竹人。粲粲好自持。時來稱此君。
乞竹贈邠老。

與君共一山。修竹居其間。義當給兩家。潘子不得慳。帶甲十萬夫。不戰終日閑。辱使支敵廬。令我愧滿顏。
代竹爲洗竹。義取洗益繁。乞我萬之一。令君風月寬。莫多以益寡。天道自古然。詩成復自笑。詩禮資儒姦。
理東堂隙地自種菜

幽居無一事。隙地自畦蔬。秋雨忽甲坼。青青千萬餘。江鄉盛菘芥。烹咀亦甘腴。豈惟供晨餐。庶用備冬菹。
桓桓左將軍。英氣橫八區。邂逅無事時。弛弓曾把鉏。矧我放逐者。終年守敵廬。諒非勤四體。寓意以爲娛。

種籩

籩實菜中芝。仙聖之所嗜。輕身彊骨幹。却老衛正氣。持錢易百本。僻處多隙地。雨餘土壤滋。栽植勤我隸。
今年時澤足。灌汲免遠致。朝畦已芬糝。零落發鮮翠。嗟余百不偶。六尺自知愧。雖甘老支牀。同願壽閱世。
晨餐入匕筯。美不儷羹葢。神農豈欺予。魏姥有前誌。魏夫人有服葑方。致神仙云。

春蔬

菅甲如刀圭。萋蒿未生葉。紫芥綠如指。蕪菁苗過苗。先生家四壁。食案稍羅列。芬芳芼薑芥。每徹有餘暇。
公侯烹五鼎。一飽廚流血。神官計功罪。沉魄受陰殺。先生飽捫腹。萬事致瑣屑。載覽損益篇。終古守斯說。
此方爲菜條爲菜。疑非此菜字。

食菘葵苗

江鄉有奇蔬。本草記菘葵。驅風利頑痺。解疫補體節。春深土膏肥。紫筍迸玉裂。烹之莖薑橘。盡取無可轍。應同玉井蓮。已過貓頭苗。異時中州去。買子攜根撥。免令食蔬人。區區美薇蕨。

七日晚同潘郎乘月到藥家觀鶴問石生羚羊角偶有之今早惠角一對良真是也吾藥遂成欣

然作詩

昨宵風月好。攜手得吾人。南街訪老鶴。夜扣主人門。入門未相見。清唳已可聞。見我展雙翅。俛啄意甚馴。訪藥偶有之。初尙疑未真。今晨墮我前。獲此萬里珍。羚羊角出文龍州。披圖驗良是。入藥定有神。望茲以試方。輔此老病身。嗟我天所窮。一事百苦辛。茲遊乃輒遂。造物良已仁。因歌遂成詩。往調柯山君。

食蟹

世言蟹毒甚。過食風乃乘。風淫爲末疾。能敗股與肱。我讀本草書。美惡未有憑。筋絕不可理。蟹續牢如緼。骨萎用蟹補。可使無鶩崩。凡風待火出。熱甚風乃騰。中炎若遇蟹。其快如霜冷。俗傳未必妄。但恐殊愛憎。本草起東漢。要之出賢能。雖失諒不遠。堯跖終殊稱。書生自信書。俚說徒營營。

谷鳥

谷鳥有和聲。杖藜北園路。悠悠雪委泥。靄靄春浮樹。櫻包欲破紅。梅葩粉墜素。幸茲沉疴間。復此賞心遇。晴陽山氣昏。積雨溪光露。四郊農事起。興懷田野趣。

晝睡

雨去天已秋。暑歸日猶永。聊爲清晝眠。度此亭午景。蟲鳴籬落晚。地僻鄰里靜。起坐晚聞鷄。虛堂無俗聽。我非汲汲者。失脚陷機穽。天道不吾欺。茲焉遣朝暝。

十三夜風雨作暑氣頓盡明日與晁郎小飲

雨洗風掃除。老火不復燎。蓐收行正令。一夕清八表。衰骸困燒煮。魂魄始可招。東窗美一睡。燈火清自照。銀河西南注。促織近堂奧。歲晚我何爲。三觴醉清曉。

寄中山鶴

矯矯雲外物。本非世所馴。懷安敗爾性。乃與人相親。嗚然而長鳴。已愧鴻在雲。馬羈當受鞭。泉汲甯辭渾。豈無山中友。初不離鷄羣。雖無月支料。亦飽松間身。陸魯望詩有鶴料。嗟我少學古。有道羞賤貧。豈出不自受。蹉跎曳朝紳。一爲折腰趨。永愧植杖耘。時時猶高談。自喜未緇磷。寄語中山鶴。吾與汝知津。

四月一日同潘何小酌

今晨一杯酒。相屬送歸春。明年東風至。何處復迎新。懸知柯山下。猶作未知人。來事如者夢。未至難預論。且使飲此酒。陶然付大鈞。

春日雜書八首

長安春雪消。天地一清潤。墻東風霜枿。新葉如奮迅。老懷輕歲月。榮謝置不問。平生兒女心。乘間亦闕進。

微芳觸鼻界。春意滿方寸。却嫌一餅鉢。事與花不應。出門逢一士。韋布汗塵土。延之升賓階。再拜色低沮。間來何所欲。涕下說貧窶。其求升斗爾。我亦不能具。我窮與君等。祿不飽兒女。一事聊自賢。無求差勝汝。年長心益衰。讀書常苦忘。當其欲談說。散墜挽不上。詩書非真學。盡記未足尙。但憎心辜眼。不爲謹守藏。書多墨入腹。無乃與飯妨。何如粲然白。廣作酒肉盎。春風無形迹。貧舍亦時至。欲將桃李踐。易此冰霜地。朝陽屋角暖。岸幘散衿袂。跡來飭妻子。裘纊且飲費。那知事大謬。暮雪卷風至。單衣不得出。宛轉眠被袂。亦知事不久。頃刻度匪易。四鄰同一歎。初不辦此計。天公擅萬物。與奪得自恣。如何倒寒燠。乃以命爲戲。浮名一蹭蹬。萬事付莽鹵。惟餘田園心。尙欲學老圃。空庭春雪盡。平地灌膏乳。買花門前翁。栽插粲可數。種之未浹日。晝夜風卷土。真須學抱甕。敢信春必雨。隔墻見藜藿。氣欲陵棟宇。彼獨誰使之。時來遽如許。謂春正無情。乃發桃與李。若真有知者。風惡折蘭芷。是非一無與。任物自生死。德之固已愚。怨者亦豈理。有圃畏不蕃。有田憂不美。吾環堵蕭然。于何生愠喜。昨日爲雨備。今晨天乃風。障風謹自保。通夕雪迷空。備一常失計。盡備力不供。因之置不爲。拱手受禍凶。當爲不可壞。任彼萬變攻。築室如金石。何勞計春冬。此道簡且安。古來家國同。

吾聞古夸父。逐日沉虞淵。以日爲可逐。智固未足言。徒能出八極。撐突干雲天。當其億且斃。更使兒女憐。至弱敗至剛。水波乃飄山。誰能守此道。却敵以空拳。

春郊草木明。秀色如可攬。雨餘塵埃少。信馬不知遠。黃亂高柳輕。綠鋪新麥短。南山逼人來。漲洛清漫漫。人家寒食近。桃李暖將綻。年豐婦子樂。日出牛羊散。攜酒莫辭貧。東風花欲爛。

又

寒池冬不流。落葉塞泉罅。東風日夕來。春色到山舍。杖藜遶東溪。流水清可架。疊石引之來。潺潺到深夜。平欄朝可鑑。倒影見亭榭。清風起修篁。翠鳥亦來下。天和人意舒。春暖景物姤。歌此濯纓詩。塵埃欲高謝。

又

致酒傍修竹。竹風吹我衣。臨觴曷不樂。感此盛與衰。昔我池邊柳。北風無完枝。春芽忽可搨。弱弱不自持。榮枯兩相召。念此能幾時。要終必復始。惜我芳華姿。自古無如何。悲歌欲何爲。聊進杯中物。日醉以爲期。

又

南山如佳人。秀色慰我思。微風從東來。清洛搖春漪。驅馬出門去。悠悠踏長堤。暖日麗花草。微雲渡南溪。高邱者誰子。斷裂崗前碑。當年豈不偉。泯泯今誰知。老翁驅牛耕。墳草半已犁。功名但若此。達士觀如遺。飲酒復飲酒。勸君無復辭。人生百無益。惟有飲庶幾。

又

長嘯視天壤。手撫白玉琴。一撫再三歎。誰哉知我音。翩翩媚俗子。一仰復一沉。靈鳳翔九霄。不願蒿下禽。擇食無果腹。貪藏有良金。豈無得與失。兩各行其心。窮通亦有命。榮辱迭相尋。躬耕儻未輟。聊爲梁父吟。

又
今晨起何早。盥漱坐南軒。啄木響高柳。春渠鳴亂泉。悠然此時心。默默誰與言。焚香閱素書。濯手開靈篇。神爽道自合。體和真亦全。蕭蕭毛髮輕。浩氣驅昏煩。呼童策藜杖。踞露開中園。擷彼杞與菊。歸烹助盤飧。既飽誰與樂。登高望南山。還歸酌美酒。興罷復陶然。

又
夜醉朝未醒。披衣步南堂。折彼曉樹花。嗅此凝露香。好鳥鳴我林。聲如韻風篁。娟娟屋外杏。願我如窺牆。物色豈不好。人情獨何傷。思我二三子。各限天一方。無髻不可游。無羽不可翔。耿耿千里心。箕昂互相望。結交古所重。義合不能忘。離別可奈何。還歸舉子觴。

又
浮雲起南山。冉冉朝復雨。蒼鳩鳴竹間。兩兩自相語。老農城中歸。沽酒飲其婦。共言今年麥。新綠已映土。去年一尺雪。新澤至已屢。豐年坐可待。春服行欲補。

又
嗟余尉窮縣。端坐百無慮。幸茲歲豐穰。庶息塵埃步。乘間策羸馬。莽莽出門去。田原亦可悅。農事藹方布。還家有詩書。客至具鷄黍。勿復嘆遠游。人生孰非寓。

又

漫漫東風來。吹此庭前櫻。纍纍綴葩萼。華采日鮮明。朝陽助輝燦。好鳥亦和鳴。起行不自得。節物傷我情。皇天分四時。寒暑無暫停。悠然一氣耳。不與人事爭。方春感分敷。秋復惜其零。一年能幾何。方寸不暫平。念此自知妄。放歌遂遺形。達人傲天壤。兒女徒咿嚶。

又

仲春漸燠沐。攄散常遠步。獨穿林下蹊。斜轉竹間嶼。鳴舉競漱石。迸筍或妨路。吹衣信和風。濯足解雙屐。深行意益愜。默坐愁亦屢。野花迎客來。啼鳥驚我去。羣鳴投樹頭。獨下過溪鷺。晴霞送斜日。歷歷星已布。娟娟新月彎。稍稍山已暮。用此遣朝昏。誰謂非尺素。

又

高臺面南山。獨立望空闊。東風悠然來。吹我鬢中髮。獨遊動遠思。覽物念所悅。伊人在千里。山水不可越。玉音坐契闊。容華有消歇。悲哉音莫致。雜珮空自結。羣飛雲間鴻。北羽儼成列。愛日崇令德。嘉好當無絕。

又

沉陰涉春仲。積潦斷行蹟。浮雲起南山。商羊未休息。壅澗無宿滯。芬芳有新摘。燈明休閒齊。鳥靜山靄夕。濁醪足斟酌。野杞柔可食。瑤簪脫籬筍。玉縷剝肥鱖。冥懷默有契。玩理方自得。庶幾達人風。持用慰寂默。

感春

淹留生白髮。默默又驚春。花房與柳萼。三見東風新。竟日雨不止。脩脩寒着人。擁裘坐閉閣。但與山爐親。

昔我東南交。藹藹賢簪紳。朝晡不相捨。談笑夜達晨。清言閒嘲諷。侑以肴與尊。風花春院靜。霰雪夜爐溫。南士多文章。最愛蔡與秦。蔡彥規秦太虛吳僧參寥者。參寥法名道潛瀟灑出埃塵。詩多山水情。野鶴唳秋旻。江子貧而廉。鄉黨稱其仁。江喻道徐子節最苦。徐仲舉五十慕其親。頗有豪俠風。時時見於文。相逢必痛飲。大醜若鯨吞。家無一金資。有口不言貧。楚望自南來。周楚望贈我佳句頻。送我歌百言。爛如張錦茵。蔡子不可見。窮泉悶幽魂。遺書誰收拾。撫舊心空存。僧寥安在哉。江漢一孤鱗。徐子益寥落。寂無人薦論。周子有書來。乃在吳江濱。其餘數子者。影響無由聞。寥寥青天高。落落參與辰。東西不相及。難合易離分。自我官窮山。耳目如聾昏。相逢半俗物。強笑接歡欣。景物豈不嘉。招攜阻嘉賓。端如守籠鶴。終日掩吾門。春風動花光。桃李日繽紛。長歌寫我思。書寄東飛雲。以上宛邱集

柯山集拾遺卷三

七言古詩

送晁將之威平簿

逢君執經博士堂。見君賜第出明光。俛眉作吏百態惡。豫章參天要雪霜。連牘秋雨老藜莧。十日不見已東裝。試尋崔丞謝客處。壁間有詩細作行。來向任威平丞。

二月十五日

春風揚塵春日白。衡門向城人寂寂。淮陽三月桃李時。街頭時有賣花兒。老人臥穩起常晚。欲強出游心獨懶。一尊美酒酬芳菲。老大不及年少時。

通海夜雨寄淮上故人

黃沙渾渾水滿川。奔流爭岸虎眼灘。南來舟子慣風水。萬斛長船如等閑。濛濛春雨楊柳溼。漠漠人家雞犬寒。道途歸人寄消息。客行安穩近長安。

泊永州城西寺下有感

春水沅沅何處盡。連檣裊裊似當時。昨日橋邊繫船客。南來北去知爲誰。他鄉異縣各風物。游子居人長

別離歎息東城修竹寺。塵埃漫滅十年題。

伏暑日唯食粥一甌。盡屏人事頗逍遙。效皮陸體。

烈日炎風鼓大爐。簾牀瓦枕閉門居。屏書居士持齋日。掛壁禪僧問法圖。鄰汲滿攜泉似乳。新春旋糴米如珠。飽飡饘粥消長夏。况值飢年不敢餘。

壬午正月望夜赴臨汝宿襄城古驛縣有古寺家人輩夜往焚香襄城古邑也可以眺二室地爽
壇退之所謂潁水嵩山豁眼明者癸未元夕謫居齊安攜家游定惠妙圓承天下大雲東禪蓋

出雨夜有感示稚穉

江城收燈寒寂歷。里巷閉門不復出。蓬茅數屋逐臣廬。門前樵牛臥斜日。老人擁褐爐前睡。眼冷不眠思往事。去年襄城古驛亭。野縣風埃尋古寺。周楚川原氣象存。峴山紫邏秀連雲。地留寶鼎周京貴。山拱泥金神岳尊。齊安江上漁樵市。誰料今年身到此。大江繞郭風濤翻。城中岡壠無平地。青紅剪綵挂影燈。漁夫樵婦來相仍。短簫急鼓集兒女。叢祠夜半鷓鴣驚。浮生夢境何足計。呼童且閉柴門睡。百年江上誰得知。竿木隨身聊一戲。

題安州張全翁大夫溪圖

清溪縈洄流碧玉。散入綠岡萬竿竹。照春四合錦繡林。千雲直上風霜木。主人吾宗行珪璧。解組歸來鬢猶綠。祇知林下酒盈樽。不憂門外車推轂。靈心內守消冰炭。洗眼旁觀看榮辱。造物乘除真有理。却將康

健還無欲。嗟予放浪已半世。斥逐不去綠微祿。六年一夢百憂患。踏雨褰裳過林麓。殺雞爲黍固留我。我自奔忙不皇宿。乃知風月爲君好。頗覺禽魚憎我俗。楚魚楚稻賤如土。老去容身一茅屋。他年杖履請卜鄰。與君靜話烹粳粥。

次韻蘇內相好頭赤

世無將軍飛食肉。宛馬不來鞭費竹。赤鴛當御亦偶然。冀北此曹量計谷。慙愧蒲梢汗流赤。翻蠶胡風嘶漢日。麒麟不合地上行。誰道風雲未經歷。

題東坡卜算子後

蘇先生責居黃州。嘗作卜算子云。缺月掛疎桐。漏斷人初靜。誰見幽人獨往來。縹緲孤鴻影。驚起却回頭。有恨無人省。揀盡寒枝不肯棲。寂寞沙洲冷。因題此詩。

空江月明魚龍眠。月中孤鴻影翩翩。有人清吟立江邊。葛巾藜杖眼窺天。夜涼月墮幽蟲急。鴻影翹沙衣露溼。仙人采詩作步虛。玉皇飲之碧琳腴。

不雨

齊安一郡雨不足。稻畦土堅不入穀。城中赤日風吹沙。老鴉銜火燒口屋。百尺長繩抽井底。井中泥滓多。于水潭邊龍祠懸紙錢。誰令霹靂驚龍眠。

厭雨

夜來雨聲倒百川。老農起坐不敢眠。曰疑漲潦捲屋去。又恐涌水與牀前。旦視山川一泥濘。流沛千頃新。秧田蝦蟇相呼動。百千不念兩股充庖煎。

又

霖霖望晴病望汗。里巷呻吟夜達旦。風清日出未敢喜。天公高居龍魚悍。夜聲翻盆晝綆糜。百川失性皆上馳。乾坤震蕩動植悲。誰居無事爲此嬉。

又

朝雨沒田夜崩屋。下民何罪罹此毒。天公行雨須口龍。那知人欲食龍肉。玄雲暮天不可決。日烏戢翼愁陽谷。區區昏墊未足憂。當念波濤翻地軸。

又

柯山老人家四壁。深居閉門不下席。日補丹田氣三咽。自言滋味勝玉食。無田無屋一空囊。不管門前三尺有錢沽酒便不憂。會見天清還白日。

夢游陳州柳河覺而作

虎豹九關未敢望。里門舊游如可尋。夢到城西古壕水。倚天高柳萬黃金。叢祠之南我舊圃。蔬甲若若春泥深。睡覺啼禽自相問。經年他鄉何滯淫。

新正

春風浩浩春陽盡。老木生芽綠如豆。古巢老鳥聲鴉鴉。南陂雨乾麥將秀。人家寒食無一月。青籩蒸魚競時節。白衫紫領來自由。縣官呼我要青錢。

苦寒二首

二月八日寒未已。山城雨過淨如洗。城門樵漁不復來。市中展齒響長街。老翁一杯百不知。酒酣放歌視羣兒。句芒當權不用事。玄冥功成徒爾爲。

又

山城新炭賤于土。老翁守壚朝復暮。時傾膳下一杯酒。不怕簷前三尺雨。共言麥好歲當熟。里巷往來聞好語。老大湯餅百不憂。折脚鑪中足烹煮。

贈馬十二全玉沿檄過楚頃刻而別

我離海邊方季夏。子時別我西亭下。是時積雨河水深。卻看孤舟放清夜。爾來忽忽冬已闌。歲晚荒涼學官舍。那知復與子攜手。猶能頃刻聽清話。來時綠樹今黃葉。須信丹顏暗中化。別離易得當重惜。歲月難留足悲吒。人生坎軻多憂娛。萬事紛紛少休暇。况子飄泊不可當。幾度相逢卽衰謝。功名有命何足求。富貴無常求亦乍。隋珠彈雀雖有獲。織塵未補千金價。我于世事甘不學。久師壁觀依僧社。辱君指我曹溪源。行雖未至甯辭駕。君如有志反邱壑。我卽求田買桑柘。卜鄰丈室聽談禪。更問老農求學稼。

別梅

宦遊到處卽爲家。况我遷謫來天涯。三年假館主人屋。忽忽屢見新梅花。那知今冬當去此。十月已見凌霜葩。繞之百匝未易別。對我脈脈如含嗟。懸知客去門復遠。亭沼人散啼昏鴉。朝風吹香散寂歷。夜月照影低橫斜。嗟我明年復何處。東州旱野連桑麻。相思時有夢魂到。極目南望空烟霞。

初夏

南風吹筍成修竹。園林一番新陰綠。足愁多病少懽娛。感時念遠傷幽獨。遙山林外知何處。倦客樓頭空極目。悲笳三疊閉江城。娟娟新月啼烏宿。

和應之蝸虎

蝸虎捕蠅君歎息。爾胡縱蝸蠅遭食。畏難悔易真可尤。能捕飛蠅猶有益。君不見。世上虛名相借與。號以千鈞實無縷。豈惟無益害從旃。搏繩之虎猶爲賢。

寒夜

暗空無星雲抹漆。邑犬吠野人履霜。歲云暮矣風落木。夜如何其斗插江。屋頭眠雞正寂寂。野縣嚴鼓先逢逢。摩挲老面起篝火。春色牀頭酒滿缸。

雪中狂言五首

江鄉密雪常在春。異哉今臘已再白。風嚴無聲掠樹過。茅簷飛霰鳴策策。老農飽食莫畏寒。天意在汝田中麥。我雖無田助爾喜。來歲不憂湯餅窄。

又

今春齊安大疾疫。閩里老弱死籍籍。篋繩蘆蓆肩兩夫。繞郭纍纍瘞千百。玄冥一日行正公。癘氣入地應千尺。異鄉身健百不憂。有錢但知沽酒喫。

又

我家中州食嗜麵。長羅如船磴如電。爛銀白壁照中廚。膳夫調和隨百變。江鄉種麥幾數粒。強進腥魚蒸糲飯。雪深麥好定豐登。明年一飽償吾願。

又

請說吾鄉人種麥。漫山亘野頃千百。北風寒嚴大澤乾。一臘何嘗見三白。春泥水消土脈動。壠畝漸縱牛羊續。街頭作餅大如槃。一歲衣食事已畢。

又

故園陳墟太昊祠。臘雪消後融春泥。韭芽苜甲初出土。春槃釘鬪如棼絲。里閭經過厭此物。糖餹寒具方交馳。江南魚稻豈不美。長年謫居長土思。園花盛開拒病不能觀。作詩諭之。

空山岑寂何所有。晚菊芙蓉相對幽。伴我悠悠過閑日。憐渠灼灼媚窮秋。清香但欲持供佛。醉舞何妨插滿頭。此生萍梗難前料。知復明年相見不。

聞紅鶴有感

東風吹曉麥青青。柯山樹頭紅鶴鳴。聽聞夢斷容歎息。憶我去年臨汝城。平池朱閣花如雪。峴山少室兩奇絕。豈知崎嶇黃土崗。茅屋蘆□風雨折。殷勤寄語望嵩樓。此身強健會重游。陳跡再尋難料得。正如三到舊黃州。

聞蘇先生除校書郎喜而爲詩并招王子中

續溪仙翁若秋鶴。有喙不向腥羶啄。幾年戢翼大江南。下看紛紛飛燕雀。親攜杖拂呵禪祖。自伐松根出靈藥。世人真自爲公忙。公甯有意人間樂。嗣皇繼明登俊彥。詔遣讎書天祿閣。江山氣象滿收貯。傾倒歸來開萬棗。咸詔無聲嗟已久。野鼓羌笳自宮角。當令鸞鳳見文章。却遣邱陵仰山嶽。王郎蕭蕭好文筆。一世清名推衛樂。嶺頭梅發始辭家。坐見長安秋葉落。滯留窮縣許過我。季心不負千金諾。何爲歲晚尙遲留。庭下寒篁還解籜。我老栖栖亦何事。一官未足充藜藿。讀書把筆工無益。執板折腰心已忤。頑踈一味難鞭警。妙道多生欲穿鑿。惟君所事與我同。他日相從鄭君學。葛稚川授道鄭君。子由先生子道深矣。

偶書二首

秋陰漫漫幾千里。赤壁磯前天接水。連橋接榭不復行。老魚擘波時出戲。黃橙紫栗收如積。青錢買酒不堪惜。北人歲久厭南食。山邊有路何時還。

窮愁晝夜陰如一。夜不見星朝蔽日。枯疇已穫大野空。怒江未落連洲沒。長魚潑刺不受釣。魚子高眠守

蓬華紫髯舊宮誰復游。鼎峙雄心久蕭瑟。
周郎戰處滄江回。魚龍蕩漾山石摧。荊州燼燼莫舉械。走君不勞一炬灰。當年雄豪誰復在。喬木荒煙忽
千載。蘄州截竹作笛材。一寫山川萬古哀。

感春

我愛沙邊雙白鷗。飛鳴相樂還相求。往來飲啄性如一。異類不至心無憂。我來窮山無與友。雖有接納非
吾儔。人生從類乃爲樂。強言笑語權何由。

對酒奉懷無咎

城門失火池魚窮。樹頭風聲酒榼空。雖貧家婦有旨蓄。一一可口不待豐。往來曳杖兩足健。醉後哦詩雙
頰紅。最憶南都晁別駕。高歌大笑聲如鐘。
我兄改秩令新昌。相望雖遠同江外。君家兄弟數如我。曹南好在龐眉弟。官微無利沾骨肉。兩處強健差
自慰。近來老子還破禪。一女呻啞猶未寐。

醉郡圃二首

東風流園開百花。繁紅矚白如晴霞。主人殷勤勸客飲。我爲滿酌酢以華。游人酒客興未足。舉首白日西
南斜。人生有酒不肯飲。百年醒坐何爲耶。

驅童晨摘承露花。薦以玉盤滌井華。誰云離本卽憔悴。持玩入手意有加。爲之致酒就几案。影落酒底不

浮葩平生看花常不足。肯使容易親塵沙。

秋園雜感

只今枯條冒衰蔓。異時密葉如翠葆。執斤之子久睥睨。簸未待薪已除竈。寄言青雲富貴人。金朱能得幾時好。是非榮辱百不知。却輸頑鈍柯山老。以上宛邱集。

柯山集拾遺卷四

五言律詩

孝感縣

蕭索江干縣。林端見客橋。山川錯吳楚。人物混荆揚。風路寒蘆陣。雲迷夕鳥行。故鄉同見月。誰記白頭吟。

蒙恩除奉常有感

平生兼周禮。投老奉龍旂。斥逐偶不死。歸來敢恨遲。門闌走賓客。行李飭妻兒。又踏長安道。多慙鬢有絲。

春寒二首

星霜殘臘過。霰雪一冬頻。雲重常昏晝。寒多更入春。晚風梢翠暮。輕雨斂微塵。滿酌山樽酒。驅愁爾最親。

又

漠漠陰還合。迢迢日自長。雲容將雨露。山意自風霜。欄甲青辭土。園枝笑倚牆。薄寒能幾許。春雨滿池塘。

春晴

溪流清欲漲。山雪白仍鋪。耕隴晴羅雉。春渠煖□蔬。禽魚隨處樂。草木向陽舒。酒病年來甚。高眠懶著書。

傷春

山城夜來雨。臥病惜殘春。暗暗鳥啼樹。飄飄花去人。地偏佳客斷。官冷酒錢貧。乘興還騎馬。田家樂更真。

近清明二首

斜日去不駐。好風來有情。江城過風雨。花木近清明。水樹閒照影。山禽時引聲。吾年行老矣。淹泊蹇何成。

又

冉冉春向老。昏昏日復斜。鮮懽常止酒。不睡更烹茶。幡起烟中剝。鷄鳴林外家。陳王鬪鷄道。風柳不勝斜。

青春

青春忽妍好。半嶺麗朝陽。谷鳥喜相見。園花明曉粧。閑居耽道味。吟眺惜風光。扣戶有佳客。悠然三舉觴。

寒食後數日方持齋誦經而東園遊人甚盛因而賦此

芳物忽過半。寒食已闌珊。園靜鳴鳥下。花稀新葉繁。焚香翻貝葉。謝客掩柴關。止酒方清坐。畦蔬助晚飧。

寒食日贈同飲者

春城風雨後。花落滿人家。宿潤留芳草。晴輝上曉霞。園林正寒食。樽酒對年華。一笑相逢地。功名莫嘆嗟。

暮春書四首

冉冉春將老。悠悠晝掩關。鳩鳴高柳暗。雨細廣庭閑。塵榻談無客。風簾望有山。啣泥新燕子。一一及時還。

又

漠漠山雲合。簷風透薄帷。柳藏陰後絮。櫻壓雨中枝。坐煖晨杯罷。香濃午睡時。薄寒猶放在。再取紫貂披。

冉冉春將老。遲遲日正長。露花低曉架。風絮集閑堂。水煖荷爭出。杯寒杏已長。芳菲值窮谷。嗟負少年狂。

又

林花飛已久。芳草雨餘長。人靜槐庭午。簾斜竹院涼。沾泥新筍白。封蠟煮醪香。莫厭殘春醉。流鶯勸舉觴。

春暮有感二首

午枕消暗永。春裘御曉清。砌紅多近采。園綠有深鳴。窗破斜光入。爐消斷碧橫。白頭爲吏苦。高臥笑浮生。

又

江城春雨暗。客舍夜燈明。搆火添香炷。擁衾聞竹聲。微明旁舍火。斷續遠樓更。何處群離鳥。孤飛深夜鳴。

感春二首

不覺悠悠過。東風換故年。青春消霰雪。白日滿山川。草綠飄梅地。江平去鴈天。故園桃李動。東望每依然。

又

爲問閑茅客。窮愁何所懽。焚香延晝睡。酌酒過春寒。歲月顛毛換。古今行路難。浮生付造物。留滯復何歎。

晚春

積雨桃李暗。西園已晚春。平池花照影。深樹鳥窺人。飛近燕知主。青分柳過鄰。浮生似羣動。聊復共欣欣。

送春

莽莽平原綠。悠悠晚樹紅。巢成鷓鴣子。柳老絮飛空。碧艸長亭路。青旂野店風。傷心對千里。無酒奈愁空。

遲日

遲日花光亂。東風酒浪深。天邊爲客恨。老去惜春心。起舞狂猶在。悲歌病不禁。高樓見千里。不醉莫登臨。

晚晴

暮塵朝雨細。透竹夕陽明。鳥雀知春去。牛羊散晚晴。官閑端欲老。謀拙漫無成。堂下清溪水。三逢蘋芷生。

秋晚

鳥栖林已靜。門掩吏□歸。黃葉雨中盡。鳴蟲霜後微。塵凝經暑扇。貂敝早寒衣。賴有清尊酒。山爐徹夜圍。

黃人謂寒食上塚爲澆山其祭饌多用蕝菜事已則鳴鉦而歸

攜酒澆山去。鳴鉦徹祭歸。青蔬蒸果蕝。白酒市無旗。市多私酒。不立旗望。日暮人皆醉。夜深歌似啼。上冢歸則歌聲甚悲。故人書問我。何用久居夷。

東池

東池久不到。搖落過秋中。萬竹蕭蕭雨。孤荷嫋嫋風。遣秋詩酒在。久客歲時窮。唯有思鄉夢。長隨洛水東。

和應之盛夏

驅馬畏炎暑。杜門常鮮懼。吳綃朝扇薄。越布夜衾單。飲沼山禽渴。沾泥雨果殘。二年薇與蕨。實厭野人飧。

和應之永日

多病倦煩暑。幸茲山水幽。惜芳悲鷓鴣。占雨聽鳴鳩。池影澄當戶。山陰暮轉樓。黃昏螢點點。秋信與堪愁。

偶摘梅數枝致案上。盘中芬然。遂開。因爲作一詩。

偶別霜城陋。來蒙玉案登。清香侵硯水。寒影伴書燈。見我粲如笑。贈人慵未能。將何伴高潔。清曉誦黃庭。

初冬小園寓目

獨樹翹寒色。閑雲澹落暉。新霜黃菊重。久雨翠梧稀。暝雀鳴還啄。高鳥定更飛。敝貂猶故在。卒歲免無衣。

冬日作二首

南雨不成雪。北風樓觀寒。眉顰魯酒薄。腸斷楚梅酸。雲夢寒全薄。湖湘春欲還。舉頭瞻去鴈。羨爾有輕翰。

又

澤國久還雨。頻妨裘褐溫。鬆懷常悄悄。醉眼任昏昏。雲赴荆王夢。天迷楚客魂。飄萍惟泥酒。吾事肯輕論。

冬日卽事

那閑多暇日。况乃值清冬。風葉已成掃。霜蕪猶復重。佛香留夜火。蔬飯候晨鐘。誰信二千石。心如一衲翁。

冬日書事二首

草草漫翁居。心安知有餘。風高收野潦。霜晚足園蔬。宿火溫茶口。明燈轉素書。御冬無旨蓄。漬藥酒盈壺。

又

孤城已慘淡。晚色復朦朧。日動烏栖葉。雲開鴈去風。草繁田尙綠。霜薄葉微紅。已是悲搖落。那堪歲更窮。

臘日晚步

喜覺陽和近。山園策杖行。草應知地暖。柳欲向人輕。殘雪通春信。鳴禽報曉晴。田間未成計。搔首向春耕。

臘日四首

今日何妍暖。青春亦不遲。竹尋穿地筍。梅有犯寒枝。雲物晴無事。禽魚暖自私。芳菲行滿眼。準擬報愁知。

又

臘雲寒不動。殘歲轉蕭條。雪意千山靜。天形一鴈高。冰留簷舊滴。紅到杏新梢。寂寞羣兒笑。因文更解嘲。

又

日暖村村路。人家迭迭迎。婚姻須歲暮。酒醴幸年登。簫鼓兒童集。衣裳婦女矜。敢辭鷄黍費。農事及春興。

又

園冷無人掃。門荒少客過。槐高庭日少。竹近野風多。霰雪催殘臘。山川對浩歌。飄蓬求季主。身世問如何。

冬夜二首

慘慘諸山暮。寥寥老樹空。尙飛霜鴈急。不動雪雲重。掛冷寒燈壁。悲傳夜柝風。隔窗無恨竹。蕭颯到晨鐘。

又

歲晚轉無趣。蓆門誰駐車。洞泉分當井。山葉掃供廚。謀拙從人笑。身閑讀我書。幸知霜霰晚。時得灌園蔬。

臘月書事

荆棘連昌路。珠璣久化塵。青山飛白鳥。野水渡行人。寂寂繁華盡。悠悠草木春。人間有興廢。何事獨傷神。

十一月七日五首

寒更催欲盡。曙色轉雞吭。鳴鴈背曉斗。清笳吟宿霜。空山歲華晚。故園歸夢長。晨起臨清鏡。悲嗟髮已蒼。

又

寒暑添線衲。朝晡折足鐺。無言病居士。面壁老胡僧。佛祖豈欺我。乾坤終有憑。窮年□一事。高臥醉騰騰。

又

山與晴天晚。江連夕照紅。高鴻知夜渚。喬木要霜風。買酒缸須滿。溫爐火屢供。窮通定何物。隨意樂衰翁。

又

三杯無奈醉。一褐有餘溫。眼下幸無事。世間何足論。山僧元飽飯。詞客謾招魂。杖策知何詣。門前老圃村。

又

水霧今晨重。山川不復分。自然無日色。那更挾霜分。鳥鳥依寒寂。漁樵散暝昏。一杯聊愈疾。令我憶遠君。

冬至後三日三首

寒暑添線衲。朝晡折足鐺。何勞問榮辱。便是了平生。理自陰陽運。吾甯口舌爭。深居玩吾寶。不遣世人輕。

又

水國過冬至。風光春已生。梅如相見喜。鴈有欲歸聲。老去書全懶。閑中酒愈傾。窮通付吾道。不復問君平。

又

梅柳有情態。江城過歲除。山村見霜橘。江市出寒魚。謫久衣冠懶。身閑故舊疎。傍籬挑翠甲。憶我故園蔬。

歲暮閑讀四首

歲暮柯山客。端居不出門。風煙限僻壤。閩井若荒村。江鳥占寒暑。樓笳報曉昏。風枝吹斷蔓。霜葉擁陳根。慷慨看□劍。煩愁泥酒樽。孤烟吹日晏。寸□語宵分。未肯傷麟泣。還須視舌存。可能天理錯。難與俗人論。魍魅徒爲爾。臯鸞竟異羣。江湖休浩渺。心拱北辰尊。

又

歲暮柯山客。蕭條酒一樽。貧閑緣事少。老冷賴爐溫。草木千山麓。蓬茅數畝村。相逢半農圃。無事理雞豚。落井吹鳴碓。橫參對掩門。人歸邑犬吠。江黑夜虹翻。櫛感顛毛減。書愁病眼昏。按方成小釀。徵古構新文。默喻乾坤意。靜看魍魅奔。何須歎虎兕。吾道古來尊。

又

歲暮柯山客。晨興理小堂。重雲隔短日。老樹□清霜。煖足加爐炭。翻經炷佛香。蜀疴藥探篋。破悶酒盈觴。江落朝宗急。年登播殖忙。江魚切玉白。楚稻撲雲黃。獵獲頻拱炙。鄰蔬屢許嘗。吾謀殊未失。曝背負朝陽。

又

歲暮柯山客。端居欲滯淫。空山唯古木。短日更層陰。水國風霜晚。幽人井碓深。年飢無貨粟。冬暖有殘砧。

靜枕聞鳴雁。開門對遠林。鳥賓朝日上。雞送曙河沉。今古竟一致。乾坤固有心。悲歌激壯氣。未覺鬢霜侵。

歲暮

歲暮無聊客。端居如坐禪。薄霜猶衣袂。多雨急收田。落日烏鳶集。晴林橘柚懸。已無軒冕念。岑寂度殘年。

小雨

小雨廉纖晚。幽花寂歷秋。嘉時空冉冉。白日付悠悠。亂思工縈恨。危腸只貯愁。唯應時扣寂。一念萬緣休。

和應之細雨

朝烟和細雨。病眼暗難分。有潤物皆澤。無聲人不聞。綠連平野稼。翠雜亂山氛。晚霽復何有。飄飄神女雲。

和小雨

入夜雨聲急。坐愁衾枕單。春歸千里恨。夢斷五更寒。遺興芳樽滿。驚心節物殘。山城近野水。半夜有歸翰。

晚霽

山川收滯雨。鳥鵲有和聲。半嶺日猶照。一天雲盡行。人皆理牆壁。吾亦掃柴荆。鵝鴨何多喜。渠流漾淺清。

秋雨書事

在苒歲云暮。空山朝夕陰。可堪連日雨。併作晚秋霖。蕭颯三川合。淒涼八月深。衰荷啼臥水。怨葉泣辭林。徑滑蓬蒿長。庭荒苔蘚侵。遠聲連促織。疎滴和清砧。燈暗殘更夢。閨寒向曉衾。沾衣貧路客。啼苦失巢禽。天接崗巒近。雲連草樹深。川容千仗肅。溪力萬艘沉。紅溼梨垂頰。黃沾菊破金。苑荒懷古恨。樓遠望鄉心。

碧漲池中浪。青藏雲外岑。客城陰燐走。敗舍溼蝸尋。騎省驚衰颯。荊州嘆滯淫。恨饒經暑扇。冷入補衣針。懶學書高閣。驅愁酒細斟。離憂殊未闕。悵望一長吟。

雨中五首

手種階前樹。今朝亦有花。春陰寒食節。陋巷逐臣家。欲酌消愁酒。先澆破睡茶。游人歸踏雨。里巷晚喧譁。

又

節物卽自好。客心何落然。早寒清野市。夜雨溼江天。破屋疎茅滴。空廚溼葦烟。政須一杯酒。相與度殘年。

又

積雨暗春色。東風還慘悽。梅殘無復笑。鶯怨欲成啼。暇日無民訟。芳時有酒攜。不辭乘輿出。病足畏深泥。

又

春殘厭寒攪。雨多空日長。飯餘時築杖。睡足獨焚香。芍藥正酣寢。海棠渾未粧。賢哉堂下竹。相對只蒼蒼。

又

三日雨不止。陰雲生我堂。曉寒如臘月。凍坐憶朝陽。過鴈低薄屋。高梅飄度牆。呼童傾一榼。獨對孟光嘗。

大雪苦寒五更無睡枕上成兩篇

大雪人跡絕。衡門閉不知。寒城悲角迥。幽谷曉雞遲。歲月去如失。窮通默自知。但知飽寢飯。天道兩無私。

又

雪氣著我屋。雞膚畏薄衾。春寒竹窗睡。曉夢故鄉心。多病妨豪飲。無私稱苦吟。小爐熾新炭。卯酒再三斟。雪晴苦寒

水驛微茫外。橋烏蒼莽中。人愁暮村雪。雁急夜淮風。大澤凍相接。羣山深未窮。蕭條歲事晚。舟楫伴南翁。雪齋

雪霽山堆黛。江晴日炫金。風烟調柳態。冰雪徹梅心。節物何斌媚。端居自滯淫。無眠聽雲雁。稍有北歸音。賦得風示秬秠

寂寂舍中韻。清風時見嘉。無意偶自動。雖鳴終不譁。宮懸奏編磬。朝佩響衝牙。誰知無譜曲。舉世好黃華。福昌書事言懷一百韻上運判唐通直

戰國韓餘壤。王畿漢舊京。福昌故韓地。南園山峙秀。東泛洛浮清。女兒荒遺廟。宜陽認故城。千秋迷佩玦。百戰有榛荆。女兒有古女几祠。按李賀詩云。女兒乃杜蘭香神女上昇地。有遺几。宜陽有韓城。路失三鄉驛。唐有三鄉驛。今廢。崗餘世祖營。光武降赤眉于宜陽。原廟今存。山疑熊耳甲。墓記赤眉兵。積甲齊熊耳山。山在三鄉西。赤眉冢在世祖祠下。昌水行宮廢。連昌宮三鄉東。昌水陽。穀州遺堞傾。福昌故爲穀州。城存。斷壕收劍鏃。耕隴得瑤瓊。姬冢邱陵抱。邑西有姬家陵。蓋周墓。韓祠草木平。韓王有墓與祠。傳家亡譜牒。懷德薦牢牲。姬陵有姬姓家韓祠土人祭之。峽勢開雙壁。川形畫一枰。謀臣赤松友。張良韓人。詩客錦囊生。李賀昌谷在三鄉界。莽莽繁華盡。悠悠井邑更。興亡誰與弔。今古一傷情。官舍連麋鹿。人家雜鼯鼯。

秋心悲杜宇。春候聽鷓鴣。賓榻無談笑。塵鞍罷送迎。平池宵檻影。萬竹曉堂聲。放宕書千卷。栖遲歲再正。
野胥形鬻掠。村隸語生瘳。脫粟供朝飯。孤豚計日烹。里閭輕學校。兒稚驟冠纓。府四學者笑冠帶。最苦衝
風隧。奔如萬戰翻。木號驚浪涌。谷震疾雷轟。古□河洛多風。福昌尤甚。目斷蘭香膊。南有露臙山。世傳蘭
香以臙示母。雲藏子晉笙。善安有鷓鴣山。村葦朝坎坎。樵斧暮丁丁。鬢自年來白。顏因醉後頰。齋庖誅野
菊。幽佩緜秦衛。憶昔初知學。時豪計主盟。討論披石室。咳唾視金籀。宅與仁爲里。豐期道可耕。蕩除秦漢
垢。藉摘帝王英。太史遺重補。騷歌韻再賡。文潢無逆楫。談陣有降鉦。戰苦心逾勇。鋒交敵喪勳。決科聊筮
仕。射策偶沾榮。憔悴官曹冗。艱難禍難嬰。未欲授臨淮簿。歲餘居喪。流年惟涕淚。生事罄瓶罌。乞米常空
釜。烹葵不厭羹。管縣長劍溢。衣補舊圖橫。波浪流萍遠。風霜客雁征。憑誰能束縵。請地乞爲氓。貧賤知何
計。飄零復此行。力微蛛紡織。謀拙蠶纏絲。大府多豪傑。何人問姓名。采葑甘見棄。連彙敢圖亨。已分微言
默。羞將薄技呈。清秋迴驥首。白日望鵬程。調拙歌難和。工迂篋未成。曳裾身阻闕。搔首歲崢嶸。豈料鹽車
困。親逢伯樂評。屬文慙賈誼。受璧過虞卿。未一獻鄙文。卽屬清舉。夙昔傾賢譽。清時仰慶閱。霜威留陞闕。
忠望在寰瀛。大澤疏源厚。明公蘊德宏。高文千錦麗。奧學萬箱贏。前歲趨畿尉。青衫拜使旌。心將言並厚。
事與意俱誠。毫髮聰明到。錙銖藻鑑精。威嚴消隱慝。惠澤舞孤嫠。爽氣開秋鑑。清談扣佩珩。霜空挂銀漢。
仙露照金莖。偉量謙常過。剛腸枉必爭。川舟歸巨涉。天柱入高擎。鱣墮開佳兆。經傳有舊囊。簪纓光故物。
堂構疊高甍。顧步丹霄近。聯綿盛事并。人間望鴻鶴。海浪引鯤鯨。百吏瞻儀矩。連城受使令。晏邊爭羨慕。

膺御有光晶。報國求賢急。搜才薦牘盈。未伏聞執事。以荐賢爲急。搜羅歸掌握。輕重付權衡。律變遭寒黍。春催隱谷嚶。陶埏皆作器。枯槁亦抽萌。量度分尋尺。題評盡甲庚。念勤寬僕僕。卹疾救惇惇。合沓皆宗薦。綿蠻不歎驚。羈鴻安肅肅。微草獲菁菁。哲匠深垂獎。非才惕自驚。厚恩山岌業。高致玉錚錚。効報期銘骨。存誠過食苹。庶幾鳴缶盎。萬一助談經。自古求知重。從來顧己輕。木欣辭爨燼。珠喜辦魚睛。歎慕身當銳。軒昂目暗瞠。自存心鐵石。敢廢力蚊蚋。荒學重禱緝。繁文自補撐。朝披枯竹簡。夜守短燈檠。養木經荒圃。疏泉久涸泓。博兼終氏鼠。禮間叔孫櫻。陋每輕樊子。勤將比老彭。中庸期慥慥。言行敢硜硜。積累功成埤。輝華秀發瑩。辛勤施耨穫。逸樂薦黍盛。戴德千鈞重。撫躬方寸明。登臨感身世。踊躍望門楹。窮谷陰多雨。清溪晚放晴。優游探物象。瀟洒付杯觥。耿耿馳千里。區區布一鳴。願迴韶濩聽。聊奏鐵錚錚。

送胡唐臣赴蘇州僉判

他日馳戎馬。風塵從事衫。花開大梁酒。木落太湖帆。幕府煩精悍。吳山入笑談。長安米不賤。君與問江南。

泛宛溪至敬亭祠送別

南國初寒候。扁舟遠客心。歸人出斷岸。晚翼會疎林。漁市臨官道。叢祠蔽木陰。長年多感慨。况此對分襟。

送丁秀才侍竹之邕州

五嶺天南極。扁舟到幾時。山川故國遠。猿鳥異鄉悲。書史傳家舊。功名及壯期。相攜有佳客。莫負錦囊時。

送蔡彥規之任風泉主簿

四十曳青袍。功名晚未遭。賢人固難進。小邑且徒勞。秦俗謳謠口。雍州形勢豪。憑君懷古意。一一寄風騷。

別外甥楊克一二首

東南秋雨足。澤國水連天。日出數聲雁。風高何處船。寒菹初獲韭。野餉屢烹鮮。吾事無淹速。悠悠得醉眠。澤國授衣早。今辰絺紵單。孤城遠目斷。秋水去帆寒。相見不再少。此生何日閑。殷勤換美酒。要對蟹螯盤。

送劉南夫赴任京師

却掃楚山根。相過唯有君。齊年未白髮。不日上青雲。送別悲秋早。傷離賴酒醺。青衫老司馬。落淚獨紛紛。

和見夢

青山將白髮。奔走倦埃塵。與物拙難合。惟君心獨親。相思成夜夢。得句寄游鱗。未得親談笑。書來莫厭頻。

和應之雨中見懷之作

官居苦岑寂。容易過花時。綠暗野初秀。紅乾風更吹。燕游心未展。歸去意猶遲。浩蕩雲山外。新詩寄我思。

用元韻因寄邦直

濠上昔相逢。同時執桂叢。遠遊悲聚散。投老信窮通。靜見賢人節。恬知達士風。淹留君莫嘆。榮辱竟虛空。

書事寄晁應之

野筍空塔短。蒲芽出水齊。柳垂縈鵲重。花裊帶蜂低。桑弱蠶登箔。池晴燕啄泥。官閑無事役。地僻斷招攜。目極榛蕪地。心傷桃李蹊。萎花辭雨泣。幽鳥別春啼。白髮驚身老。高樓對日西。運逢詩將健。路入醉鄉迷。

燒醕傾新臘。輕羅換舊裾。香紈裁暑扇。密幄徹寒閨。喬木陰垂屋。清渠冷接溪。惜芳幽鶉鴝。催夢怨黃鸝。高會思前日。酣歌到曉雞。駕羊君自幼。倚玉我慚驚。誰解藏車轄。歸來信馬蹄。還家門寂寂。過雨草萋萋。氣合非容易。官拘坐阻睽。孤吟唯酒對。愁立見烏栖。學懶因循過。詩成取次題。相思不可望。烟靄暮淒淒。

題所居西齋

幽居不厭小。小院有深庭。一曲秋風地。低簷夕照明。脫條株有態。止水瑩含清。中有支離客。吟腰瘦沈卿。

題楚州聖井并贈主僧

古佛勝妙力。一泓常湛然。禱祈供衆欲。守護賴師賢。清碧晨齋罷。秋登寶供前。自憐多病質。時許挹清泉。

題倪敦復北軒

瀟洒倪夫子。新城面北堂。庭前無獄訟。客至有壺觴。晝靜塵埃絕。春餘花草香。爲君題素壁。容我醉中狂。

書壁

後院人稀到。荒池半是苔。好花隨地有。幽鳥自山來。靡靡香草合。陰陰夏木催。昭亭有佳色。每至不容回。

和應之石澗

麥氣朝含露。溪光夕照煙。鬪麋蒼角老。雛雉絳毛鮮。葵折紅綰縵。蓮香水麝燃。敢辭幽僻處。直恐負林泉。

李贊皇畫像

管樂久寥闊。興王一士多。平生自龍虎。功業在山河。公子悲黃犬。騷人赴汨羅。當年閱川恨。流落復如何。

散步西園

歲晚傷局促。散懷唯小園。鳴禽下荒寂。孤木倚高寒。閏月長蔬甲。清霜瘦竹竿。荆人重鮮食。怪我厭魚餐。

七月七日晚步園中見落葉如積感而作

東園久不到。落葉曲池平。搖落遽如許。歲時真可驚。衡茅望故里。漁釣寄餘生。放逐逢艱歲。藜羹未敢輕。

秋園

山蹊久不到。落葉滿秋園。幽草自寒綠。晚花翹碧鮮。鷄豚放斜日。鷗鷺下遙天。閩里經過熟。居夷已一年。

種圃

促舍亦爲圃。從人笑我癡。自求佳草木。仍補小藩籬。吾事正如此。人生聊自怡。霜松未及尺。獨我見奇姿。

東園二首

小園晴自掃。曝日坐前軒。野鼠穿山葉。寒鴉啄草根。短籬藩隙地。別徑入孤村。幽趣供岑寂。淹留不復論。

又

水落橋痕在。沙乾岸草枯。霜餘槐老壯。風際竹清疎。啄木高逾響。鵲鴿飛且呼。二年親友絕。唯有對禽魚。

萬松亭有感

小雨濕青松。松間多好風。翠光濃欲滴。對舞千蛟龍。可惜青玉斂。道邊委花蓬。幽人不汝棄。應有綠毛翁。

幽草

幽草堂軒秀。盆池遇雨添。新晴雀哺子。永日燕穿簾。世事休驚目。閑中且養恬。黃公有美酒。時得醉厭厭。

又

衰草已無賴。秋花只強名。雨園蛩響細。寒樹鳥啼清。淹泊知吾道。幽居見物情。唯應有鄰叟。足雨問農耕。

山暝孤猿吟

平野何岑寂。空山晚易陰。微雲數峯暝。幽谷一猿吟。風果飢逾少。霜枝冷不禁。引吭當落日。激響度前林。最惻騷人興。偏悽遠客心。空齋懷謝守。空復昔時音。

以上宛邱集

